

四庫全書

史部

欽定四庫全書

史部

姑蘇志卷二十三至
六

詳校官編修_臣曹振鏞

檢討_臣德生覆勘

總校官知縣_臣楊懋珩

校對官中書_臣李斯咏

謄錄監生_臣譚世緯

欽定四庫全書

姑蘇志卷二十三

明 王鏊 撰

官署下

吳縣舊治秦漢時故處在子城東北打急路橋之東唐

分州城東南地置長洲縣遂移置府治西北二里縣

基本雍熙寺菜園官與之互換云

雍熙砧基作諸家巷

宋仍之

元徙譙樓內府治之右至正末張氏遷於永定寺後

十六觀堂舊基

淳熙十二年趙善重建縣門并書額寶慶三

年趙善瀚弼門樓淳祐三年魏廷玉重修前有井二

亦善瀚弼西曰惠泉施清東曰義井

臣銘唐梁肅記在春秋時列國各有

屬邑其主者魯謂之宰楚謂之尹晉謂之大夫秦時天下始置令長宅一同之內操賞罰之柄有人民焉有社稷焉風俗善敗本乎身黎元安否繫其政其體大矣自京口南被於淝間望縣十數而吳大國家當上元之際中夏多難衣冠南避寓於茲土參編戶之一由是人俗舛褻號為難治加以州將有握兵按部之重邑居當水陸交馳之會承上撫下之勤征賦郵傳之繁倍百他縣夥乎其中不可勝紀大歷十一年天官擇可以長民者於是范陽盧公繇太原府祁縣令為之外寬內明敬事而信政本於仁飾身以文下車三年闔境之人安居樂義而不知安樂之所從來盖平以和也夫君子立身論道之通塞不論位之升

降吳縣下畿服一等公俯而為之抑選部為官擇人
而其履道從政所由然也予知者敢錄其實書於東
序以播其令聞時十四年二月甲子翰林學士梁肅
記此記得之類書中若其姓名則不復可考矣郭受
記厥今天下經用之所資百貨之所植東南其外府
也度淮而南濟江以東督府且十附城且百而田疇
沃衍生齒繁夥則吳實巨擘焉予嘗登靈巖之巔俛
而四望畎澮脈分原田基布邱阜之間灌以機械沮
洳之濱環以芟捷則為鹵硤確變為膏澤之野蘋藻
葭蒹壑為杭稻之陸故歲一順成則粒米狼戾四方
取給充然有餘出平胥口以臨震澤積水無涯兩山
對峙桑田翳日木奴連雲織絰之功苞苴之利水浮
陸轉無所不至故其民不耕耨而多富足中家壯子
無不賈販以遊者繇是商賈以吳為都會五方畢至
獄市襍擾縉紳以吳為樂土僑民閭里幾亞京雒為
政者急之則怨而駭緩之則弛而肆泛然而多容則

請謁紛紜幾至於骫法毅然而多拒則謗詈叢集必困於遊談牢字之任信難矣右通直郎許君來領是邑直方不撓有骫骳之風簡易無苛得調胥之術蓋常急於豪猾緩於善柔整其大綱闊其細故為之期年而縣治元祐六年霖雨敗稼吳民阻饑君日慰藉而拊循之賑給務均卹隱求實不事虛名而為文具也予以是知君之篤於從政也舉茲以旃則其於整彫弊而應盤錯也何有焉水笛之明年君且代矣乃悉求前為此縣者之名氏爵里將書而刻諸石顧其僚郭受曰吾為是俾來者有攷焉爾子為我序諸辭不獲命因槩叙吳風而毛舉君政之一二許君溫陵人世為學家甚博而文異日顯用於時當不獨以循吏稱也元祐七年五月初一日縣尉兼河塘溝洫郭受撰乾道三年范成大續記吳令璧有記尚矣唐大厯己未梁肅為之詞者令盧某所立石亡而文傳本朝元祐壬申郭受為之詞者令許公輔所立石雖

存而中更兵燹缺裂無幾後七十有六年晉陵袁君
祖忠政成將歸始治二石更刻之又斷自建炎以下
為之續記實乾道紀元之三祀歲在丁亥距大厯垂
四百年而題名三立相望可攷吏民以為盛事然吳
之為壯縣固自昔志之氣俗之嫩生聚之繁覽觀之
勝著於二碑者自若獨官事掄擢日不暇給必出於
甚難而後能善治視昔類不同者非特吳為然余行
四方所過縣邑數十百見大夫皆厭苦其官齎咨太
息悔鼎之來而憂後之不得脫余私恠其說甚哉何
至於此及切磋究之使一言其詳則曰古吏憂民而
已今顧不然葢爾邑負責猶數鉅萬晝夜簿遽唯錢
穀之知且不能報期會有如一日姑舍是而用力於
民不崇朝百適滿矣彼齎咨太息厭苦而欲脫者真
有味其言哉今夫急催科則愧政專撫字則愧考兼
善之誠難若袁君蓋幾於無愧者其政先理而後情
弛例而舉法故吏不能並緣士不敢奸以私民有訟

自揣不當勝望寺門心醉卻去直者家居待報曰無庸謁吏明府自辯此坐堂上再期人信之如一日至於大官之間須求於不有責課於非時則又從容辦給弗以厲民率常最於他邑嗚呼可謂難也已旦莫去此至大官勢益易於為縣其所成就何可量按續記所登載無慮三十人而未有顯者必將自袁君始儻余言猶信來者尚勉之八月十五日夜奉議郎主管台州崇道觀范成大記并書

知縣廳祥符圖經云在州西北一里

前志云紹興三年蔣結建廳

西有平理堂天聖中徐的建後更名無倦

端平中王良能為縣

殿講蔣璠書水壺二字揭于此乃以唐姚元崇水壺戒刻石

淳祐初改曰近民堂

南北有小山南亭曰松桂北曰高蔭皆淳熙五年趙

不忿建廳東有勤清堂淳祐初魏廷玉建

劉震孫命名王遂記

開禧間吳機弼明恕堂饒虎臣改美錦堂山上有琅

然亭東南有亭名河陽圖

銷收汴取苑李雜植因名

又有拙軒堯

爾清心二亭亦機所作

延射亭在平理堂西天聖七年馮允成作

節度推官章珉記

臺故封為一都會郡領五邑吳實首之百里之封五
品之令曩歲限以常調治付中詮是將赤子奉其吐
齧國家精求治本重字人之寄近制銅墨之任闕即
以京僚洎朝列或幕賓補之先是繼署占勝逼于閭
閻綿歷歲祀梁木將壞乃有前宰棘寺丞徐君繕完
之圩漫訖功移符罷去則今南越郡計馮君實代之

也君世襲衣纓練明吏街下車未幾政用佳茂廼因
圖訟之隙周晚解舍患無清曠之所得奉讌息之娛
縣之西偏舊有幽園俯於佛舍并吞仍歲君披圖按
籍命工冀除疊繚垣以入之繇是砥平其基而歸然
為亭雲集枝葉而茂乎為堦蔭以佳木之清畦以雜
花之英穿沼以類滄溟築山以擬蓬瀛五畝之地百
步之逕而佳致足矣君衆藝畢給愛客忘疲每茹筍
絕稀簿領多暇春華爛而在目暑風冷然罷扇秋英
墜砌冬霰集楹君賞心樂事擊鮮為具召貴介公子
同僚諸英注弦筈以引滿擲絲管以度曲賽百嬌之
格矢爭牛先之奕路中厨出乎豐饌而千里之莠下
豉雕盤薦乎佳賓而庭山之摘厥包終日督過醉實
未去燭已見跋主歌未晞雖雒中之季倫山陰之辟
疆咸有名園雅好賓侶吾不知其彼為勝此為劣也
亭之既成命賓以落之監郡集賢公嘉乃好事隨其
景趣悉為雅名揭於華榜觀者知意此用畧諸若君

愷悌之政殊尤之績采風謠者入境可知固不在因
亭以敷暢之也下幙不佞嘗從事於文墨請書締結
之始謹用春秋之法異時宰是邑者集簪纓於斯
犬貳於斯惟其圖之天聖七年春三月二十有六日
吳郡從事試芸臺讐書
郎武寧章玳字伯鎮記

西園多美石有太湖甲族不染塵移雲三亭

丞廳在縣門內東隅

主簿廳祥符圖經云在縣東今在丞廳後

尉廳祥符圖經云在縣南七里盤門外盧氏云按尉
司舊在教場西北隅紹興十四年趙伯建移今所慶

元三年趙希實重修有范希文石曼卿所書韓文公
伯夷頌開禧初羅相改勑廳事作師清堂又有軒名
排青後改平遠黃震又改柏臺皆景定三年重修教
場在其西

長洲縣舊治在府治後東北三里元徙譙樓內府治之
左至正末張氏遷於本縣學西即宋舊治王元之所

為記處

王禹偁記天下稱宰邑之賢者率以宓不齊
為稱首以彈琴化民民不忍欺謂得致理之

要也殊不知行是道者不獨繫於人亦將繫於時矣
當時王室雖微皇經未絕有周禮在魯則單父豈曰

亂邦有聖人爲師則子賤宜乎行道居百里之位得諸侯之權社稷民人自我而已井田車賦得均其輕重刑罰教令得齊其寬猛凶荒水旱得專其賑恤農時民力得聽其休息然則無私於心克儉於身辯田之腴瘠定賦之上下強暴者刑之以法孝弟者旌之以禮寬其教以誇人峻其令以約吏時豐則歛之歲饑則賑之農有力而不奪役非時而不行闢之以庠序誨之以禮樂使父子親兄弟友夫婦和然後祭祀以事鬼神行賚予以睦鄉黨自然懷土不散熙熙如春弗知其然而然也在上者不鳴琴而何俟哉洎王道云亡霸圖孔熾大小相併強弱相攻區區子男宗廟不保故傳曰漢南諸姬楚實盡之又曰楚縣陳蓋縣之始也秦併天下畫三十六郡則小國皆爲縣而隸於郡矣國之於郡猶身之有臂也郡之於縣猶臂之有指也國取於郡郡取於縣縣取於民是以臂指撫民而自奉也由是田有暴賦丁有常庸春役而夏

不休朝令而夕必具小則懲之以役最大則隔之以
刑法豈惟道不能行亦將身就其辱遂使宰邑者苟
祿食免笞罵而已昔人歎徒勞賦歸去者為是也向
使子賤復生亦將捨琴折腰奔走不暇況行道乎雖
欲不顧其時不程其力亦猶建一指而扶天柱不其
難哉時使之然也長洲之名見吳都賦貞觀中分吳
縣以建之垂二百年宰名氏縣誌闕焉錢氏享國幾
一百稔專建屬吏莫得而知皇上嗣位之二載漢南
王歸於我國家始設官以理焉袁仁鐵首之王禹偁
次之其土汙潴其俗輕浮地無柔桑野無宿麥鰕魚
飯稻衣葛服卉人無廉隅戶無儲蓄好祀非鬼好淫
內典學校之風久廢詩書之教未行兼并者僭而驕
貧窶者欺而墮田賦自重民力甚虛租調失期流亡
饑踵或歲一不稔則艱楚盈庭不能輯事矣至有市
男女而塞責者甚可哀也蓋隔中夏之政浸小國之
風使今聖人求理於上庶官陳力於下斯民之泰其

有漸乎禹偁非循良之才位凋瘵之邑仍以舊貫民
安仰哉會到任之明年大有年也先是有漕運者轉
民歲租更送他郡苦舟楫之役糜堰埭之費者久矣
至是始聽民以本屬郡輸之從便宜也亦小康之有
萌矣是歲獄訟靡繁賦調中考因鳩歛民瘼平議政
體總而刊之存諸廳事待賢者以舉之所謂言而不
能行者也時大宋雍熙三年正月九日守大理評事
知縣事王禹偁記此記兵火不存紹興十年知縣石
理重刻石
吳騏隸書

知縣廳紹興初重建祥符圖經云在州東北一里餘
茂苑堂在廳事東紹興元年石理重建中有百花亭
尊美堂維摩丈室綠野軒綠筠菴淳熙九年曾栗繪

王元之像以祀改曰企賢慶元中復舊

米友仁茂苑堂記長洲令

尹石理瑩中才高氣剛嗜古好雅下車既久政成事簡蓋牛刀割鷄游刃裕如者邑解之東有所謂茂苑堂前人取左太冲語帶潮汐之濬池佩長洲之茂苑意也考之圖經即江為池距縣南七十里多厯年所高岸為谷無足深恠訂之於古莫可得實視棟楹之顛圯乃鳩工而函新之堂之南榮植以嘉木修竹奇芳蕙草鬱蔥吐秀而森然敷陰如在邱壑邃深處與堂相直曰百花亭即堂之西為建屋曰尊美堂其北龜首曰維摩丈室北向聚羣石如巖谷曰綠野軒又南開竹逕曰綠筠菴皆增廣而揭以是名琴書雅玩陳列於中客至則閱古賞奇試茗烹飲必與之從容竟日怡然自適曾不少倦後之君子游息乎其上要當勿復翦伐如甘棠之愛顧不懿歟紹興己未季夏二十日襄陽米友仁元暉記方干題坐看孤峭却勞

神還是微吟到日曛松鶴認名呼得下沙鷗飛處聽
猶聞夜關亦似深山月雨後唯關滿屋雲便此逍遙
應不易朱衣紅旆未容君王禹偁移任長洲詩五首
移任長洲縣舟中興有餘蓬蒿猶見月棹穩不妨書
雨碧蘆枝亞霜紅蓼穗疎此行紆墨綬不是為鱸魚
○移任長洲縣孤帆冒雨行全家隨逆旅一夜泊江
城身世漂淪極功名早晚成惟當泥尊酒得棗任浮
生○移任長洲縣窮秋入水鄉江涵千頃月船載一
蓬霜竹密藏魚市雲疎漏鴈行故園漸迢遞煙浪白
茫茫○移任長洲縣辭親淚落衣折腰雖未晚搔首
欲何歸曉月霜華重晴山栗葉飛江頭鷗鳥在應怕
不忘機○移任長洲縣沿流漸入吳見碑時下岸逢
店自徵酤野廟連荒塚江禽似畫圖高堂從別後應
夢宿菰蒲春日公舍偶題薄宦苦流離壯年心力衰
鶯花愁不覺風雨病先知曉月晃竹屋寒苔疊蘼離
無人慰幽寂庭柳自低垂長洲遣興七十浮生已半

生徒勞何日見功名折腰米賤堪羞死負郭田荒好
力耕庭鶴慣侵孤坐影隣鷄應信夜吟聲年來更待
賢良詔咫尺松江未濯纓○妻兒莫笑甌中塵只患
功名不患貧自覺有文行古道可能無位泰生民烟
村舊業勞歸夢雪屋孤燈照病身投
老綠袍未休去九重天子用平人

歲寒堂

菊月亭

蟠翠亭仲并建淳熙五年呂存中重修

熊頤正記申國呂君宰長

洲之明年行受代矣一日公退吏散約客相羊縣治
之圃時屬初夏紅紫事休宿雨收霽新綠鬱勃林采
煥發荃葉左右屏列餘花錯落如綴珎珎有風徐至
芬香襲人乃命酒坐蟠翠亭上君指柱間仲公彌性

之詩有云樛枝密葉翠虬蟠者曰名以是為花故也
余居此之日久矣率夜漏未盡五刻起視事漏下五
六刻猶不得息壯懷倥偬於簿書期會間領畧于此
盖不一二數也適少間拾餘材為文其將傾葺其甚
弊朽腐則新之敗蠹則墁之示不欲以將去而怠其
事焉方此佳時一杯相屬客盖盡歡於是楚人龔養
正使折花侑生起以酒屬君曰夫草木之生其性也
遂深山大壑清曠廣莫春敷秋隕付榮瘁于自然亦
復何有不幸而名人從而玩之封植矯揉摳助其長
而人方以為異而喜要非其性分也士而志於用小
而小大而其得而遂耶達者視之犧象孰先於楓
柳蓬艾孰後於蘭茝耶抑余聞叩蜀山林中此花如
積藥城蘇公詩半垂野水弱不墮直上長松勇無敵
等詩槩可想見君賢者後號有家法周旋州邑老益
更事且有用於時顧欲遂其私且不可得若余者其
將遂余生乎異時尚記前後二公之詩見此花為一

笑君引飲酬遂書以記之
時淳熙戊戌四月上澣也

泰民堂在縣圃淳祐十年龔湛建

陸德輿記長洲龔令君作堂縣圃摘

翰林王公壁記語扁以泰民既屬予書且諗以記予
思專斯堂之美遜者再請益勤予不可得而遜在易
上坤下乾泰陽氣下降陰氣上騰陰陽訢合萬物生
遂天地之泰也王澤下流物情上達上下相孚百姓
悅豫君民之泰也天地之泰天地不能自泰也必有
賴於贊化之主君民之泰君民不能自泰也必有賴
於宣化之臣宣化之臣其最近於民者莫令若也令
最近民使民之泰則易然蓋即泰之卦觀泰之象思
所以致泰之由乎泰之六爻惟九二言治道為詳其
曰包荒用馮河不遐遺朋亡者包荒含容也馮河斷
制也不遐遺無忽於小朋亡無牽於私交泰之兆
實繫於此反是則不交不交否矣然則令之於民庸

可忽必也居之以寬納之以仁學愛之化如彼武城
率之以信斷之以明不擾之政如彼蒲庭母頑之忿
毋細之鄙當若上蔡視之如子母邪爾思母側爾蹈
當若姑藏不改其操如是則氣之所通和之所致薰
為嘉祥以靖以際民其不泰乎其或弗操弗鉏弗究弗
慮如彼曲阿徒事求譽為酷為豺為暴為驚如彼義
縱治法行治愁嘆不聞疾疢不顰有若謂南閭念恤
人利障不屏欲源不澄有若陳倉率歛自營如是則
氣之所闕怨之所鍾形為咎證是萃是叢民其可泰
乎一邑者天下之積也一邑之泰天下之泰所由推
也一令之賢一邑之泰所由致也董子曰今之郡守
縣令民之師帥也夫惟聖明在上師帥之賢參錯天
下則天下之民胥泰矣長洲地大物繁臺府鼎立夙
號難治君處之裕如知所先後戶庭無滯訟田野無
冤聲始至撤犴狴新之將去以空囹圄蓋十數年未
有王公所謂生民之泰其有漸乎幾之矣觀君名堂

可以知君用心後之來者毋第以零陵三亭視是役也經始於淳祐庚戌八月落成於十月為楹若干為費若干役成而民不知又可書也已君名濩今淮東常平使者基先之子其賦政固有源流云中奉大夫新改差知溫州軍州事陸德輿記并書

芳秀樓在廳事後寶祐五年李念祖建

丞廳在縣治西淳祐初重建

方杼記國家建官倣唐舊制自九寺三監萬家

之邑率置丞員所以重其任貳其長也邑於民為最近丞於邑無所不當理漢後元之詔曰縣丞長吏也長洲為縣創於唐天后朝乾元中置為長洲軍至大厯間已而復舊國朝中興吳居三輔長洲土廣民衆素號難治為丞者非材術兼茂有經理人之績莫得而著稱焉後儀趙君帝室之胄沉酣經學挾其所有取

甲科佐江陰幕淳熙改元轉而丞茲邑視民如愛子
馭吏如束濕興利除害邑人宜之君蒞官葉再黃矣
政成而民有餘力年豐而物不疵癘視事之所棟宇
歌橈懷桶朽蠹上漏下濕殆弗可居於是發私財以
佐其用度故地以全其基役以廉至工以巧獻無損
於公無擾於民廳事廊廡輪奐一新為三十餘間堅
涂整密瓴甍堅滑高其閑閤固其垣墉使後之居者
得以賴其利焉工既告成邑士願紀其歲月以傳示
將來矧居是邦見聞君之政稔矣凡今之人視官舍
猶逆旅顧弗毀而加葺者已無幾積在官餘祿為居
閑之助亦理然也君秩行滿又斥家財以給費求古
循吏罕見傳比貪者聞風庶亦知勸噫昔之建一堂
翫一亭猶侈其事以詒後人若君謨之清暑子瞻之
喜雨是矣觀君此舉匪為翫游之所如於人數等其
可無書乎君所以設施於一邑特其小小者耳推而
上之庸可既哉姑書以為記云淳熙四年三月朔甫

陽方
子記

主簿廳密邇縣西紹興十七年尹機重建

黃士持記
長洲主簿

廳在縣治少西紹興十七年縣長尹侯機所建也經始苟簡計不及遠矮屋數椽陋甚歲久蓋障穿缺支柱歌危潦雨至上漏下濕坐榻一日數易夜聞聲者然則想其覆之壓也慶元丁巳仲冬上泝予承乏庀職既弛瞻顧鬱悒則有意圖新焉然簿職卑力涼毫髮公費皆仰給於縣曩時長官或泰越相視居此者憚煩避謗蓄縮不敢謀因循歲月則棄去若傳舍亦勢然也予獨癡不自止試令梓人平章以圖來諗竹瓦木石計會纖悉業已素定越二年乃以請於令大夫黃公宜治縣有聲而友僚佐如兄弟喜曰此公家事耳子能躬其勞吾何靳焉於是考日鳩工昉於季秋之戌申迄於仲冬之己丑貿材於市募庸於肆民

不與知而工以辦告靡縣帑之緡四百五十有八廩
斛二十有四餘亦捐俸百千以佐用前門一間廊屋
八楹廳東西偏翼以兩軒可待賓至寢之後為丈室
安明窓四向時暄涼啟門覽以禦濕於娛親為宜繕
以垣墻高丈餘闢小徑通縣圃其西有敗屋數間撤
舊取新為圓漏庖爨之所是居也不侈不庳於今若
未足視昔則已夸予且滿去後來者無忘營躬之難
以時增葺其將多餘前功不則因弊塞瑾亦可為數
十年之利然非余所料也書生每事欲為無窮之思
正與北山愚公可同一笑姑識余意於石時六年庚
申三月初吉長樂黃士
特記山陰孫應時書

尉廳祥符圖經云在齊門外去縣三里

續志云在齊門外緣塘一

里許淳熙十一年曾復重建廳西有臺扁曰奇軒

崑山縣舊治宋縣治即今治紹興二十六年知縣程沂

重建舊傳孟尚書捨宅為之故今猶祠孟於縣門內

之東

葉子強記崑山秦膠邑也天下壯哉縣五季雲擾四方纂於兵吳越雖保有所履然詩書仁義

之事缺焉國家文經海內始嚴令守淮海王以版圖歸時邊公倣治吳最首賜璽書褒徙以來尚旄頭紫微間能即學立夫子廟北門王公元記之故此地翕然趨於文至今好學而知禮尚孝而先信乃有昔之流風焉壘岸海江夷曠沃衍者數百里一山巍然惟石錯立井井闌闌間又有室屋林壑之勝士大夫自京都來官者樂之觀遊詠歌未覺身遠其歌艷者至合省寺賦祖帳之詩繇此以相以輔小卻言語侍從之班踵相躡也而其意依然于是二百年間風流縕藉續續可紀又建炎間敵獨不侵薦紳北來樂其土

風而居之宜遊間多勝事益號佳邑屬歲縣計蹙束
須入者聞其名相與駭汗若蹈甚畏豈先後難易若
是不同邪亦才術限量之或異邪不然則今之所謂
不足非古所病邪曷其趨違異見如此漢之郎官上
應列星出宰百里晉之舍人洗馬妙天下選然不更
長吏不得為臺郎今天子重字民之官褒庸旌善使
觀瞻者以為榮顧力所底爾因仍規畏其可哉子強
至之踰年勞於耳目思慮之外廼喟然而歎信學力
之未至則諷諸前人以矩範焉然所傳止自崇觀間
益稽史牒硲識得自雍熙以次五十有六人序而鐫
之石尚俾來者知前輩優游庶幾勉之淳熙丙申六
月縉雲葉子強記并書宋張方平覓山初秋觀稼回
縣署與同寮及示姑蘇幕府邑民三萬家四邊湖海
遠家家勤穡事市井嬉游少苻歲逢水冷饑勞何擾
擾我來忝撫字見此心如搗去秋僅有年高田尚停
潦今幸風雨調皆話天時好春喜鵲巢低夏更蟬聲

早吳民以此候早潛飢穰拏船袂參差葑岸縈回繚
莖插暮更急車聲達清曉紡筥猶掛壁何暇張魚鳥
我時行近郊小艇穿萍藻渚長葭亂深野沃肥極倒
孺子遠餉歸閒暇顏色飽預喜省敲笞租賦可時了
歸來軒館清曠蕩盈懷抱衙退人吏散庭廡間窈窕
露篠映孤亭風荷動幽冶置身木鴈間茲焉願終老
顛蹶走榮利况余拙非巧鱸膾飯紫芒鵝脂酒清醪
紫芒鵝脂稻名悵然懷友生虛齋為誰掃周承勛
題縣圃蘊輝亭瓦礫頻年積勸耨十輩功旋移低地
碧頗維亞枝紅對酒逢寒食憑欄接暖風墻慳天自
闊堪送
北飛鴻

鼓樓嘉熙丁酉七月圯淳祐己酉重建

頌春宣詔二亭在縣樓左右紹熙三年知縣李稠建

平政堂在縣治內舊名琴堂知縣李伯長改今名

清心堂初名讀書堂知縣葉子強建

松闕林知縣項公澤建已上在縣治南

縣圃在縣治內東偏葉子強築

錦香亭 弦歌亭 蒞輝亭 樂全堂咸淳四年知

縣林桂發建已上俱縣圃內

丞廳在縣治東

簿廳在縣治西有西堂淳祐九年主簿吳堅重建易

名覽輝

高士軒在覽輝堂之西吳堅建

縣尉司在縣治南內有隱齋笑月亭分翠軒皆王尉
齊興建

殿丞解舍在縣西南

巡塘解舍有月波臺並在縣治西南

監務廳在縣西南

本府節制司酒庫

節制司太倉巴城許務高墟四酒庫

贍兵酒庫在縣東故近民館也

醋庫在縣西南

戶部漳浦石浦新安三酒庫

各以贍軍吏部揭關注官課入版曹兩浙

漕臣提領其事月解徑詣臺縣無預

商稅茶鹽場在縣東南

黃姚鹽場

酒稅務在縣西南二里又有酒坊在縣東南百餘步

安懷坊在舊治東北一里淳祐十一年項澤建以處

老病貧乏之民

始崇寧三年詔州縣置居養院以存老者安濟坊以養病者紹興十三年

令戶部措置支常年錢米人日一升錢一十文小兒半之

惠民藥局

養濟院

常熟縣舊治舊縣廨多宋治平間屋廡東北有琴堂紹興中孔瓚重修淳熙中劉穎改扁學愛四年曾榮新作寢室舊有君子堂共賦堂慶元四年孫應時重建

又於廳東創笑軒葺後圃為亭曰友山西為夾牆繚
寢室後以通西偏為亭於西北曰是亭亭之南即共
賦堂後累石山與君子堂通嘉泰二年何充重建元

陞為州治廨仍舊

曾慎記常熟為縣其來久矣舊為
毘陵郡南沙縣至梁改為常熟自

梁歷唐由唐迄於偽吳幾數百年前尹是邑者姓名
莫或紀錄故不得而考焉本朝太平興國中錢氏以
圖籍歸於京師始於縣令蔣文澤至元豐初知縣宣
德郎劉極求得其姓名凡四十有二人列之板榜置
於廳壁角自此來尹者至則書之觀其間相繼登金
門上玉堂儀羽臺閣正位樞極蓋翩翩焉未見其止
余因承乏慮板榜不足以久傳於是命工鐫之於石
立於廳之左闕者補之庶為不朽之傳宜觀名列以

勸方來俾尹斯邑者知夫儒之効愷悌及民福延百里庶幾乎刊石而無愧也紹興二十一年九月魯國

曾慎

記

知縣廳頗雄偉嘉定初葉凱於隔舍南闢軒曰簾晝
寶慶二年惠疇於後圃創景言閣紹定四年史彌厚
治東圃建堂後戴衍扁為讀書堂嘉熙初王爚因學
愛堂之舊重創易曰道愛淳祐十年別構治西圃移
讀書堂於其中亭曰直節遂廢東圃

丞廳在縣治東淳熙初丞張孝伯重建廳事其燕坐

曰涉筆曰篤素軒

簿廳在縣治西與丞廳對淳熙間簿蕭遠重修廳事
有燕坐曰愛蓮靜暉寄隱淳祐十一年簿唐世中復
新其堂榜曰均政

尉廳在縣治北二里鄰順民倉紹熙中尉趙笈夫創
廳事後小閣曰樂山改曰挹翠復易曰斗堂北有小
圃二亭曰藏春曰野趣淳祐八年尉周介夫通葺新
之廳西軒曰梅隱後臨流築亭曰濯纓

宣風樓在縣治西紹熙辛未曾慎建紹興四年葉知機更曰慶豐自此至賞心亭皆權酤之所

燕喜樓在縣東

旨清樓在縣西北

春風樓在縣東迎恩橋南

賞心亭在縣西即舊弦歌館

縣樓永平時所建紹興二十一年太守徐琛篆額乾

道

間趙善括易以林東篆刻石廳側

慶元己未孫應時修之左右有亭

左曰御筆手詔右曰寬恤事件

國用庫在縣中門西廡

省庫在縣廳左

苗倉庫在縣廳左

軍糧庫在縣治西南

醋庫今但存醋庫橋

戶部贍軍塘頭河陽原墾支塘四酒坊

酒稅務在縣東北坊橋

市易務在尉廨西南猶有市易務巷

本府梅李尚野徐鳳塗松陸河五酒坊

馬軍司莫城五林二酒坊

凡諸酒坊課額盈虧縣皆無預然酒不越境內或有

私釀則訴諸縣
縣為懲治而已

養濟院

惠民藥局

吳江縣舊治宋舊治祥符圖經云在縣城內運河北元
與國朝皆仍之縣門舊有敕書樓三間紹定五年李

椿新之

李處全救書樓記松陵令趙公伯虛為邑二年其農桑勸其獄訟簡其簿書錢穀治辨學

有新田三高有祠百廢具興不為苟歲月計先是建炎中國步方艱而邑當敵衝祝融回祿相其虐自後踰四十年閭宇庫陋夷於民編乾道強圉大淵獻公始撤之為新門培基取材百用先具梓人執斧斤以聽畫至瓦甃坯釘亦出於公之指授焉其始於秋而落成於冬遲速之程不微於素飛樓干霄與江山長雄環視具區笠澤之廣雲烟卷舒濤瀾吐吞舞鴻鵠而歎魚龍為三壯觀公乃以季冬之月盛服率佐屬奉詔敕其上用以鎮撫其社稷億寧其神人遺民故老告語子弟咸謂役不踰時而功倍於昔微令尹不復見此矣是時距公終更甫旬月公不以欲去急其事朝夕於斯迄用輯成真古之用心也使今之人用心皆如公君家之事尚有不舉者乎故予樂為之記乾道元年左承議郎新權發遣沅州軍州事李處全

記

知縣廳紹定李椿重建袁肅題曰琴堂移舊堂於東
名曰清簡西築室曰誠齋廳東曰圖思

易拔
書扁

廳後有

仰高觀政環翠三亭並在縣圃中

丞廳在縣西南紹興元年宋應重建紹定二年許景
迂重修廳西有景袁堂

袁名韶樞密
越國公也

湖濱有與永亭

即舊湖山堂嘉定中趙晞賢修號為江湖奇觀

簿廳在縣西乾道三年高文虎重修又建曾程堂以

旌前政曾楸程俱之賢淳熙六年曾公之孫樞再修

之嘉定五年謝杰重立

廳扁真文忠公書

寶慶三年龔應之

重建門屋紹定四年趙勲夫復新堂宇有回車館與

廳相對

李處全曾程堂記余同年友高君炳儒主吳江縣之簿二年既請於府縣以新治舍又即

其西作堂三楹為退食之所規制穩密不庳不隆榜之曰曾程以禮部尚書贛州曾公楸中書舍人信安程公俱嘗為此官示尊賢也且屬余記之余幼侍先君獲拜二公席蓋知其文章議論軒輊一時在京師已蘄蘄有人望曾公既登華近而程公亦賜第擢館閣迄為中興第一流先後典內外制渡江文物追配中原二公有助焉其去此雖遠而流風遺迹猶或可攷尚友昔人炳儒得之矣炳儒行終更去一紙書入

光範門諸公當爭挽致之由西垣入北扉丹青帝謨
鼓舞羣聽則於二公何羨雖然孔子之賢賢孟子之
論世其尊德樂道之風可少廢邪後之君子將有取
於斯文乾道三年四月朔日贊皇李處全記范成大
新修主簿廳記州縣之任古謂之官遊豈直以斗升
易農而已哉名山大川雄尊奇秀之境從事其間足
以窮覽觀而昌神明古之君子固有樂乎此矣松江
大湖水國之勝當天下第一四方好事者想像其處
欲至而無繇今行臨東南士大夫假道以走名場與
夫商賈百族擢船而逐利者聽颿相摩此其人皆有
所期會囂呼爭先亂次以濟終夜洶洶有聲其勢豈
能少留而一寓目是雖日過乎前而與未始至者奚
辨余家吳門莽蒼在望又無聲利火馳之役宜能數
遊而躬耕作苦正爾少暇日私念誠得築室葦間卜
隣三高以朝夕於斯吾樂可勝計邪乾道丙戌八月
既望間從容汎舟垂虹主縣簿高君炳儒適新作治

所落其成余與觀焉蓋自始後至是財七十日而門
闕高昭牖戶靚深髹續甍鋟皆中度程既聚廬之百
須無一可恨而為之讀書之齋休坐之堂脩竹繞園
光景瀟然所謂垂虹者乃在其旁數十百步耳夫出
有江湖之趣居有清燕之適此固古之君子宦遊之
樂而余素願朝夕於斯而不可得者炳儒之職會計
當而已無催科敲朴之煩奔命將迎之勞而有可樂
者如此於是求文以為識余聞漢高士不為主簿孫
子嚴徙舍而有喜色士未遭隨所遇而安其可愧者
不在我也炳儒有文學行誼而不卑其官又作意而
新之視祭竈請比隣有加焉其志固未易量始為叙
其所可樂以告後之賢者使共之明年二月一日順
陽范成大記并書左廸功郎平江府吳
江縣主簿主管學事四明高文虎建

尉廳在縣東嘉泰中彭法稍葺嘉定間黃耆重建紹

定五年王龍從增初於東偏後圃有梅亭

惠民藥局

養濟院在縣西北柵頭淳熙間初後又增廣之

稅課務在縣治東子務三所在震澤同里平望

抽分場在本處

嘉定縣舊治縣樓宋嘉熙四年七月圯於風閏月鄭霖
重建

知縣廳後有公忠堂憇召堂熙春臺當山樓紹定四

年趙與祐建讀書林淳祐九年林應炎建

水竹亭在縣內淳祐十年林應炎建

濟川亭在縣前寶祐元年沈輝建

丞廳在縣治西嘉定十三年陳采初至端平三年謝奕恭成之

主簿廳在縣治北拱星橋左嘉定十三年趙汝備初至十五年黃自誠改廳事淳祐十一年趙孟奎皆一新之

尉廳在縣治南舊法華菴基也嘉定十三年趙希炤
初至今有教場射亭

新江酒庫在縣南二十四里

徐公坊酒庫在縣西二十四里馮橋

侍衛馬軍司酒庫在市西課解淮東總領所

江灣鹽場在縣東南八十里係江東清浦

黃姚鹽場在縣東北五十里附下砂場埽煎

酒務在縣衙西

商稅務在縣東市嘉定間立

和豐樓在縣市淳祐十年林應炎移狃嘉慶樓於市
西

惠民藥局在縣市西太平橋北

養濟院在縣市西登平橋西北

元幕官廳在縣治東廡延祐七年提控案牘陳鼎建
立廳名佐正

蒙古字學在譙樓東至正五年劉文質建架閣庫在

州治後東偏至正五年知州劉文質新建

太倉州舊治宋平江府節制司酒庫 節制司太倉等

四酒庫

醫學在文廟西

養濟院在州治西

惠民藥局在鎮民橋南

抽分竹木場元置在長洲縣而分辦於太倉國初設

官於本府分辦如故今廢

蘇州府船場在小北門外洪武五年靖海侯吳禎建
今改為厲壇

兩淮都轉運鹽使司分司在長春橋西永樂二年初
今廢

滄江風月樓在北巷口元之酒館也

安樂堂在海寧寺西憇養病卒

崇明縣舊治元縣廳舊扁曰敷政郡守任子明書後改
曰無倦後堂在小山前扁曰奉公後改自公

蔡景行
重建崇

明州記皇元慎選守令分治海隅職專而任重事有利害令舉以行重邦本也善為政者審其勢而度其宜則民不勞事不繁而易底於成此崇明州之所以遷而其理之所當重建也崇明為維揚屬州斥鹵衍沃中海而居非舟楫莫能至州之境日為風濤蕩擊浸及理所且歲久署宇時陋有司視若傳舍秩滿即引去忽焉不加憾憾於其心至正十一年達魯噶齊巴哩雅侯始至歎曰吾奉天子命來守是邦民之休戚繫於上吾民兢惕既無以奠厥攸居又署宇若是是皆事之所當先者烏可委其責於後人而弗之察也於是周爰咨度得地於州之北十五里曰東沙出海稍遠遂遷焉侯首捐己俸為之倡而知州程侯同知州事王侯用是其議俾州吏錢實施思敬魏德新董其役州之人士聞而樂相者奔走恐後掄材庀工其制尤宏於舊工興於十二年之三月落成於明年二月黃堂重嚴門廡輝映幕廳吏舍譙樓庫庾靡不

完好環州有垣環垣有壕周衛緻密經畫殊至侯復
念朝廷以六事責備守令而教為之首乃先創孔子
廟大闡學宮仍增廩給之糧若干石以為士養師徒
弦誦洋洋盈耳思有以振起次及祀典之神食於其
土者咸新廟以祠至若軍校萬夫長府率皆崇敬雄
偉式稱演武之所工畢其耄倪雜然而至舉喏喏相
告曰吾儕小人不意今復見是州之鉅麗如此實有
以聳吾民之視瞻也不可以不記遂疏其本末介州
士董仁禮來諗記於予時予職教崑庠而婁江與崇
明相望僅百里間每獲聞已哩雅侯為政之善民之
頌之若出一口嘗欲一艤舟東沙造觀新州以挹其
土風之美繫官於茲願莫之遂廼今庶托文字載名
其間抑何幸焉嗟乎民不可慮始而可與樂成事特
易於因仍而難於首創是州之民始亦懼其役繁將
無以致其力終則樂其功成而為無窮之利非侯之
力足以致其力足以立功能若是乎雖然為政之道

豈徒奉法制宣禁令而已若侯者誠為民之司牧能為之深謀遠慮審其勢權其宜而民賴以寧者也後之來者樂署居之廣而思創始之不易專心一力無曠厥職以侯之心為心則崇明之民殆相安於悠久矣前年海寇犯境侯親率義兵奮矢石扼其要衝而悉力攻之海寇由是遁去侯之可書不一而足茲姑述其設施之次第刻之樂石以慰邦人之思去而不忘耳侯唐古岱早備宿衛由雲南討賊崇勲權太府監管勾願終外艱服闋授平江路總管府判官今為州云平江路崑山州儒學教授蔡景行記

吏目廳在州廨左扁曰蓮幕

捕盜司在州治西扁曰晏然任子明書延祐間判官

邱揖建

頌春亭在譙樓南

萬戶府

官醫提領所大德八年例革併入醫學

富有庫在州廳右

架閣庫在富有庫南

惠民藥局

姑蘇志卷二十三

欽定四庫全書

姑蘇志卷二十四

明 王鏊 撰

學校 書院附

今天下言學校必首蘇盖有范文正胡安定之風
焉其中島池亭榭尚多吳越元璫之遺其勝亦他
郡之所鮮也況人才往往為天下先乎若夫作興
敦率使教化行風俗美則不能無望於上之人焉
府學在城南延袤一萬九千丈周一百五十畝按唐史

李棲筠增學廬宋祥符圖經子城西南有文宣王廟

俱不言學所在景祐元年范文正公

仲淹

守鄉郡因州

人朱公綽等請始為奏聞立學今所

地故廣陵王錢元璫南園公得

其一隅將為宅相地者謂當踵生公卿公曰吾仍給

田五頃以贍學徒延安定胡先生瑗主教事嘉祐中

刑部郎中富嚴建六經閣

張伯玉記六經閣諸子百家皆在焉不書尊經也吳

郡州學始由高平范公經構之至今尚書富郎中十年更入政學始大成而六經閣又建先時書籍草創未暇緝厨之後庶澤地汙晦日滋散脫觀者惻然非古人藏象魏拜六經之意至是富公始與吳邑長洲

二大夫以學本之餘錢僦工市材直公堂之南臨泮池構層屋起夏六月乙酉至秋八月甲申九旬有七浹計庸千有二百作楹十有六棟三架雷八楠三百八十有四二戶六牖梯衡案椀圻墁陶甃稱是祈於久後興而不庠酌於道故文而不華經南嚮史西嚮子集東嚮標之以油素揭之以油黃澤然區處如蛟龍之鱗麗如日月之在紀不可得而亂矣則天地之極致皇王之高道生人之紀律舉在是矣古者聖人之設教也知函夏之至廣生齒之至衆不可以顧解耳授故教之有方導之有原乃本庠序之風師儒之說始於邦達於鄉至於室莫不有學垣之以文物聲之以聲名先用警策其耳目然後清發其靈腑故其習之也易其得之也深其教不肅而成不煩而治殿元元之入善域優而柔之俾自得之萬世之後尊三王四代法者無他焉教化之本未馴漸也然則觀是閭者知六經之在則知有聖人之道知有聖人之

道則知有朝廷之化知有朝廷之化則嚮方之心日
懋一日禮義之澤流於外絃誦之聲格於內其為惡
也無所從其為善也有所歸雖不欲徙善遠罪納諸
太和不可召康公之詩曰豈弟君子來游來歌子思
子之說云布在方冊人存則政舉凡百君子繇斯道
覺斯民暢皇極序彙倫者捨此而安適得無盡心焉
諸儒謂伯玉嘗從事此州游學熙寧中校理李紱又
滋久宜刊諸石庶幾永永無忽

割南園地廣之元祐中生徒日衆公綽之子長文掌
教事議欲盡南園餘地為齋廬會范公子純禮制置

江淮漕事過家為奏請詔給度牒十紙充費戶部郎

中劉瑾直龍圖閣王覲大修

長文自為記神宋受命
興治乘輿常幸國庠親

臨講席一時鴻儒碩生聞風以起有若戚堅素在睚
水种明逸在終南皆聚徒講授髦俊歸之景祐中范
文正公作學於吳又躬於潤滕子京建於湖慶厯之
盛公參預機政而石守道孫明復首居太學是時仁
宗開天章閣召輔臣問以治要公復以學校為對於
是詔天下皆立學及公以天章閣待制守是邦相地
之勝莫如南園乃割其巽隅以建焉廣殿在左公堂
在右前有泮池旁有齋室是時學者才逾二十人或
言其太廣公曰吾恐異日以為小也於是召安定先
生首當師席英才雜運自遠而至厥後登科者逾百
數多致顯近訖今五十餘歲學者倍蓰於當時而居
不如闕也長文適忝命掌學周視黌舍傾陟徧迫寒
薄暑燠諸生病之乃與同僚議請南園隙地以廣齋
廬元祐四年會公之子兵部侍郎公純禮自奉常制
置江淮六路漕事擁節過鄉遂以白公公即延見諸
生感慨陳迹奏言蘇潤之學皆先臣所建後人久不

葺而齋室不北風雨講習無所願給錢修廣有詔給以度牒十紙充費前守戶部劉公選官治役度用賦工而今太守王公並以闕賦之材助以亡命之卒完舊剏新累工逾萬暮歲而告成不以一分取於民公堂廊如也廊廡翼如也齋室凡二十二而始作者十為屋總百有五十楹而初建者三之一立文正安定祠宇遷校試廳於公堂之陰榜曰傳道庖厨澡室莫不嚴潔窈然而深曠然而明其處也寬其容也衆南窓引愛日北牖延建炎兵燬紹興十一年直學士梁清風咸適其宜矣

汝嘉建大成殿鄭仲熊記十五年直學士王暉繪兩廡像復建講堂闕齋舍鄭億年記乾道四年直祕閣姚憲闢正路疏泮池立采芹亭九年直祕閣邱密建

直廬淳熙二年脩撰韓彥古作仰高亭十四年脩撰

趙彥操即六經閣址建御書閣

藏高宗所書
石刻六經

洪邁記

堂左建五賢堂

祀陸贄范仲淹純
禮胡瑗朱長文

寶慶三年大風殿

閣壞紹定二年復學田租於時直祕閣林介朝請郎

王與權朝請大夫王斌直寶謨閣李壽朋相繼新之

吳潛記淳祐六年待制魏峻修

李起記吾鄉學宮甲
子湖右儀門正殿授

經之堂肄業之室直廬廊廡莫不雄深巨麗殆非一
人一日之力起甲戌歲入太學宦遊南北有自吳來
者僉謂顏圯日甚私竊有憂焉不特為學校惜也太
守為民師帥非惟富之庶之又從而教之中吳號富

庶郡今貧矣民貧而官亦貧取之錙銖用之泥沙調度不足凜凜是虞方從事於簿書期會之不暇而何暇於他哉朝蠶莫鹽僅循故事毀墉傾屋委而不葺心非固然力不逮也貳卿方泉魏公來守二年踈剔舊弊而作新之民不益賦官有餘用倉盈帑羨取之不匱於是郡博士何德新因以修學為請侯即捐五萬緡就命德新主其事又簡幕僚以董斯役凡為屋二百一十三間始於淳祐六年二月越四月而訖工士之職於學者相率以告曰子盍為記之起夙預教有與諸生同一憂喜今貳卿能治其昔所未治者前日之憂轉而為喜矣寶祐三年學士趙與憲拓地鑿池作橋門

建齋九曰敏行育德中立就正隆本

教宗室子弟

曰立武

教武舉士

曰養正

教童子

曰興賢登俊

教士之俊秀

閤後建堂曰

成德曰傳道堂後建泳涯書堂立雪亭右建道山亭

山南園故邱即朱長文所題泮山

王景齊記元大德初殿宇壞治中

王都中謀於兩浙鹽運使朱虎以私財撒而新之燕

公楠記至治元年總管師圖里托重修延祐間重建

六經閣取張伯玉記文首句名曰尊經

楊載記宋康定間吳學始

造六經閣請浙東帥張伯玉為記以屬其佐曾公鞏
文成置弗用伯玉自為之鞏歎服其文傳天下至淳
熙間郡守趙彥操即其地改造御書閣有元大德五
年東海有颶風之灾閣碎為齏粉延祐五年鄧公文
原持部使者節來勉勵學校誦伯玉之文歎是閣之
不復見也則語教官陳君伯曰吾聞吳郡學租頗多

苟畢入無負以之膽士不寧尚有餘也取以營閣則前賢之遺跡不終泯矣陳君克己自厲敏於應事往時學租之不可責者唯陳君能責之繇是聚米如山倉廩皆溢明年鄧公復來以此責郡守班布爾實侯及曹侯宜奉行詔書興起學校檄郡幕官之長李仲英使董凡役事屬議咸曰嘉定義士沈君文輝以漕海有功拜忠翊校尉其人樂於施捨強力有幹習於工役之事遂具禮聘焉沈君承命唯謹召大匠陸文隆與定制掄材李君屬徒以會其役舊閣前距大池僅半步後迫明倫堂巍然為屏蔽惟正畫陽景不下燭居常憤憤然稍北五十步當止善堂之後有隙地乃移構焉閣凡三間兩翼三簷二十八楹為高八十尺東西一百尺南北五十六尺倚檻而望郡郭之內浮屠老子之宮雖樓觀相連凌虛特起其勢皆詘伏在下無敢與之爭為長雄其規制之奇偉如此凡六閣月而閣成用中統鈔千五百四十錠有奇米五百五

十石沈君所捐以相之者復二百錠又增置垣外地
五百四十丈環植松柏萬餘株為屋以周於四阿經
史子集各以其函櫝刻金石絲竹匏土草木八字以
識之又大書尊經閣以揭於楣間壯麗特與閣相稱
屬筆於載

至治二年錢光弼修廟學

柳貫記彭城錢侯光弼自大梁

移牧斯郡至之三日修禮於先聖先師顧瞻堂庭荒
第弗治退即教授趙晉之問其故晉之曰比歲吳田
敗於水廩粟之入不贏二三吾興土木其將疇資公
能責其逋租而視其不可緩者完葺之學得不毀而
功則有繼侯曰然為擇謹敏吏司校計簿而督其當
輸不輸者得中統鈔五十餘錠乃相禮殿論堂門廡
齋館及尊經閣先賢祠易撓腐為堅良化刳缺為麗
密而以其餘力築垣墉一千五百尺凡所經營必諦
必審圖為可久毋繳速成厥既僦功釋菜於先聖卒
徹觴客貫時與在賓席學之師生揖貫言曰自侯之

至哉屬荐饑軺傳杳來符檄業委人謂侯將祀梳綜
理之不暇而暇加意於學侯則不然凡所以惠綏吾
學者愈於整暇之時今考成有薦薦已有至正五年
宴子實執爵以酬乃為我著之以示方來

總管吳重修十五年監郡六十築廟垣凡五百七十

丈

魏俊民記吳郡之西南偏孔子廟學在焉廟居學
之左繚以宮墻凡百餘尺築土為之雨淋日炙弗

克堅久教授徐震學正徐昭文學錄邾經一日相與
慨曰自宋迄今三百餘年而宮墻歲加墁飾始免頽
圯計其費幾萬貫矣無寧易以甃石為悠久計乎上
言於監郡六十公經歷白公樞二公曰是吾志也爰
命教授偕府史劉鼎計工度程躬董其事其費一出
於廩粟歲用之餘墻之基內外為石三層凡五百七
十丈其袤九十五丈高盈丈而隆其三下廣殺高之
數丈有六寸上廣如下之數而又殺寸之三甃一十

五萬瓦三萬六千九百役傭二千三百他物稱是用粟一千斛始事於至正十五年之六月告成於其年八月十九年總管周仁又修之鄭元祐記二十六年總

管王椿建樂軒

周伯琦記學之有殿以崇祀也殿之有軒以合樂也殿作於大德戊戌修

於延祐戊午聲容叙秩每病其隘蓋將七十年矣郡守海臨王侯時虔奠謁傷焉於懷爰重改作誕謀恢益廼乘露臺伉南甍而增作新軒起於至正二十六年丙午之歲四月至七月而訖功其制三間中廣二丈左右各殺三尺四寸棟隆二丈七尺六寸深殺隆一丈一尺藻井中甍八觚齊緻金鱗錦羽蛟拏鸞騫文版夾覆玉采輝絢遐睇山立仰瞻雲升軒以殿崇殿以軒邃體勢宏麗庭陛肅嚴於是虞業之設鐘磬之縣琴瑟搏拊之陳簫管笙籥壎篪柷敔之列秩乎其倫粲乎其章登歌合聲協律諧節以達薦饗以熙

獻酬陟降旋折綽如裕如所以昭格欽報者儀文咸具於乎詩書禮樂四代之學所以立教淑人者也禮之節以經邦紀民樂之和以移風變俗其功用廣矣大矣釋奠於先聖先師尊其道報其德禮之隆者也翁五聲六音以致敬享貫神明章教化樂之殷者也古者典教用樂故樂正崇四術立四教以造士升其賢秀材而官之內則臣工外則民神以是成己以是成人馴致雍熙而人人有士君子之行王侯之有功於學校其以古道自任者哉殿軒之作雖一役也可以槩其政矣

國朝洪武六年魏

守觀即成德舊址建明倫堂

滕用衡蒙扁

復地之侵於民

者五百四十丈展靈星門以臨南衢

宋濂記蒲圻魏公守姑蘇之明

年乃鉏暴樹良德綏化孚上下洽和百廢具興惟孔子廟學顛危弗治公顧瞻良久喟然嘆曰皇帝大興

文教詔頒明經六藝諸科嘉惠多士將以人文化成天下今弊陋至是非所以靈承帝意公即捐俸為倡唯興修是圖其僚屬與郡之人士驩然而趨功以廟言之穹殿脩廊敞以靈星之門以學言之論堂中居兩廡相嚮挾以六齋於以達於前門至善之堂尊經之閣又巍然而聳其後嚮也棟橈級夷黯昧而無輝今焉丹雘炳煥簷牙而翬飛已而泮池有梁采芹有亭先賢有祠亦皆次第就緒而公拜蜀省參政之命將之官有旨還守姑蘇民大欣慶公復命補其墻墉四千八百尺有奇唯廟學之前乃吳江甯開之園局於封畛蹙迫殊甚至是從化盡以其地六百尺入於學宮始獲闢門於前用正地勢內厯洗馬來香二池架梁以通往來外臨康莊左右有坊曰狀元曰畫錦其嘉名符契若有開必先者閣後之地奪於比隣久矣公察知其奸其地乃歸又懼遠而或堙也遂圖廟學四疆勒堅珉以志之始事於洪武六年正月甲子

而訖功十一月較之承平舊觀或有過無不及焉公
名觀字杞山通周易王彛記惟蘇州學肇基於范文
正公父子學之左別有廟而靈星門南不十數步即
畫於鄰垣於是旁趨東偏為門而地勢鬱塞弗稱鄰
垣之地廣袤若干畝在宋為錢氏園及元而業更甯
氏先後為郡者屢欲拓之然不可以力得至正間郡
守六十公貿其地於寧開得其三之一槩入國朝前
國子祭酒魏公以正學碩德出守茲土政修令行大
修廟學開說公化盡以其地歸焉公因命教授貢頴
之繪圖而經營之郡士願出私錢以助乃通道自靈
星門以極於南城之涂凡若干丈故有洗馬池適當
其前遂表文廟之道於洗馬池南而架梁以入道南
北之半故又有假山山之陰有池曰來秀其水自太
湖入南城沿至南園之小河而注之學自來秀南流
則進之洗馬而止其北流則歸泮池而止又即來秀
池南闢假山遺址為門以正南面焉至是學與廟出

入之道殊矣故入其門則循池之東以趨於廟出其門則折而西又折而北為梁者再以達泮池之梁始趨於學示神人之不可雜也方廟學造成翰林侍講學士金華宋公既為之記僉謂以為此一役也范公所未得為而魏公乃得為之始終幾三百年而廟學大備有不可不特書者命記之十五年張

守冠塑聖賢像况守鍾重建明倫堂五間宏壯逾舊

建齋四左曰隆禮中立右曰養正志道齋後有室訓導

授業所齋上下建兩廊學舍堂後重建止善堂易名至

善又建毓賢堂於後教授何澄記正統九年李守從智築牆六百三十丈景泰元年朱守勝建會饌堂三

年汪守許增建學舍三十間於毓賢堂後初范公及先賢文昌三祠俱在殿後天順四年姚守堂徙范公與先賢二祠泮池南撤文昌祠易隆禮中立二齋名

成德達材建杏壇學門內覆之亭重建道山亭

教授黎擴

記蘇為南圻大郡其學制之雄麗池園之幽邃為江南諸學之冠尊經閣之西數步有小邱隆然而起高約四五丈廣約畝有畸名之曰道山山之前後有大池繞山上下羅植松柏雜木陰鬱森聳千雲蔽日登其巔可以盡得一城內外之景宣德間太守南昌況公鍾始作亭於上四隅之柱以石四面之窓以鮑深廣各二十尺崇比廣而減四之一壁間嵌古文碑刻翼然奇偉之觀師生於勤業之隙得為游息之所後

將三十年亭日就壞去年夏四明姚公堂來守是邦蒞學勸課之餘乃登斯亭俯仰低徊徐而歎曰前人之蹟忍坐視其廢矧有益於師生紓勞釋瘁者乎於是捐己俸市羣材易腐以堅補缺以完加以藻繪題以華扁既訖厥功煥乎其改觀矣

六年林守鶚改建廟兩廡諸賢塑

像歲久且壞始易以木主成化二年邢守宥重建泮橋移射圃於學後四年賈守奭作游息所前鑿方池布橋立坊曰衆芳惟大成殿自宋元至今凡三改作皆隘不稱成化十年邱守霽乃大規度之建殿重簷五間三軒兩廡四十二間撤舊材作戟門七間掖門

二間學門故東向歷廟道折而南入仍厚價售居民地拓之與靈星門並由是基趾方整規制大備卹去

劉守瑀繼其事

學士吳寬記蘇有學于城南實創于魏國范文正公更五百年來所以修

葺而開拓者惟賢守是賴至於今日規模益壯天下之言學者莫能過之故四方之賢士大夫之道郡中以一遊其地為快然猶病文廟與學之弗稱也其制似非特視學為陋歲久且敝爾乃成化壬辰鄱陽丘侯霽來知府事政既克舉境內悉治歎曰事神吾職也有如文廟散陋孰任其過乃請於巡撫左副都御史畢公從之則計財度工擇日而從事始改作大成殿於舊址之北而侵西者五丈有奇復作靈星門南與殿直以甲午三月興工功垂成侯報政之京遂去任矣其年歲吾劉侯瑀自監察御史來代乃畢其事

他日知長洲縣劉君輝知吳縣文君貴暨教授林君智輦合言於寬以二侯之功不可泯者願記之嗟夫孔子之道大如天地與之相參高如日月無得而踰萬世之下被其膏澤者區區土木豈能報其功邪人復為此無亦盡所以尊崇之禮以免有司之過爾盖比歲儒臣建請有欲加以籩豆侑舞之數者下羣臣議亦謂此不足為孔子輕重而朝廷竟從其請行於天下惟所以尊崇之者無所不致其極也詔下為丙申之秋適當丁祭之期籩豆既陳侑舞斯列而棟宇深廣足以有容觀禮者美之寬故學之諸生也於二侯無能為役因諸君之請敢忘其淺陋而書之初學門在廟街之東凡出入於學必涉街以行邱侯以神人之分當嚴也顧旁近多居民民既喻其意皆樂徙去乃徙其門於靈星之西更為門於泮池之北以達於廟然後廟左學右截然以正後有賢守以廟學為事者尚修之葺之以無隳其成功也哉

二十

三年又以先賢分為名宦鄉賢各一祠

名宦祀宋王旦富弼歐陽

修蘇軾王照富嚴王燾趙希憚陳豈倪普趙興蕙葉適李侗陸九淵楊簡魏了翁國朝周忱夏元吉况鍾

孫鼎陳選鄉賢祠祀唐陸元朗陸贄宋滕元發朱長文周南老王蘋滕茂實陳長文國朝陳鑑陳繼陳祚劉鉉杜瓊按名宦所祀多有不係於蘇者當更詳之若常應物則有特祠在文廟傍其扁曰集賢太守及考本傳未嘗稱集

弘治三年孟守俊以安定宜專祀

賢學士史或失之

建祠范公祠左十二年曹守鳳建嘉會廳學門外為

師生迎候之所十七年林守世遠以朱長文有功於

學遷入安定祠今學制前臨通衢衢南皆平郊左廟

外為靈星門郊之當門處壘土為小崗隱起入門則

洗馬池

上有石橋錢氏故迹也

為神道道左右有碑亭二一宋

濂修學記一舊廟學圖又北為紅門為神厨省牲所

省牲亭又北為戟門門西為神庫置祭器

銅器一千五百六十

竹器三百四十木器六十五

樂器

琴瑟等九十有六樂舞生冠帶六十有六衣二百八十

門

內廣庭高陞歷露臺始至殿右學外為嘉會廳與學

門相直門之前為泮宮坊入門東則杏壇直北為來

秀橋入鍾秀門路左右名宦鄉賢二祠又北范公文

定祠又北泮池

石橋上有

又北儀門門內有大池跨以長

橋石洞凡七

名七星橋

過橋始上露臺

臺上有范公手植柏二今存其一

登明倫堂堂後至善堂又後毓賢堂又後尊經閣閣

後過衆芳橋至游息所左采芹亭

有小池

右道山亭

前有

大直北射圃中有觀德亭教官之解宇諸生之庾厨

布分畫列其後又有池沼畦圃長松古檜望之不見

其際云正德十二年巡撫孫御史樂提學張御史鰲

山協恭修建仍令郡守徐讚主其事嘉靖間詔天下

起啟聖祠敬一亭乃於大成殿後造祠六經閣前建亭

吳縣學宋景祐時始立在舊縣治東南

今三皇廟基

紹定初

縣令趙善翰改立於舊貢院南

今為南察院

司憲林介撥

公產贍之嘉熙四年知縣魏廷玉主學孔煜重修

清施

臣記天地以理而位天理以學而明若稽隆古由內達外畿服皆學所以扶植三極而為降衷之宗主也周備之我宋繼之國於東南三輔之邦倚郭分學惟吳有之吳學肇端於景祐初自後兩邑皆附郡泮吳最壯縣臺府鼎屹賦輿租薄急符終訟文書程上者日有千緒雖強敏者救過不贍奚暇以教養為急寶

慶丙戌永嘉趙侯整棼夷類材謂老練細大畢張一日謀勅費宮選寬卜勝實興坊之近城有勲府遺業賢之良稱置槩相址層峰峙西津流亘東貢闢都左容館規右豁然形勢之環合是時飛廉振林拔偃虞麓松杉杞梓不索駢獻自尚匠至崇成役匪淹葺為廣厦四十餘楹外聯四齋中嚴一殿從祀有像講習有堂游息有亭凡什器備焉實紹定初元也其間以序養士以田制食司憲林公介先撥公產五百餘石綉衣吳公淵守符鄒公應博續增一百餘石前美後裕輔教思不窮之良圖又閱十有六歲嘉熙庚子宛陵魏侯屬意學事文傾風雨之漂搖提綱歲月之湮墜鳩田畝於鐫刻汰浮冗於竄名有養必有教先是隸之佐廳吏借影私長屬不相誰何遂更鄉官舍選為之範模里彥文行為之領袖潤色鎮密士皆德之昔嘗謁記辭不敢為今謂礬石久矣無文何以詔往汔不容已輒為之言體具則憑藉牢慮遠則植立耐

廼經營是學者也志績則其用新弊隄則其傳壽廼
維持是學者也原民生而俾返民生之懿秉寓有司
而不負有司之法度廼訓迪是學者也趙侯剪萊築
宮置犂供粒百須均足以為善教之地經營固難而
維持亦未易魏侯值多艱之時倥傯不給由後紹前
所以扶植教法者心心膺契絕出債視償邑之見兩
侯致力於學者豈欲羣居諸子始以舖啜而來後以
利祿而計要當造伊洛下學上達之妙克朱張切問
近思之端訓朝廸夕希聖齊賢儻或外驚辭溺彫浮
過眼風花之不留好鑽虛詭旋踵霜管之非實苟而
已矣孟軻氏云人倫明於上小民親於下即理也豈
不與天地並哉趙侯善翰壬戌進士遺愛去思魏侯
度玉輔政世家載美相濟新池陽校官孔君煜
壁海前郎今主教席淳祐三年立夏節日記
淳祐
七年趙汝證又修之建采芹亭風雩壇元至正間縣

長馬祖憲復新殿堂齋舍更塑宣聖四配像繪兩廡
先賢像縣尹張經為靈星石門楊昇又脩之繚以周
垣俱有記國朝洪武五年魏守觀闢射圃建觀德亭

宣德九年周巡撫况守鍾以地逼西城且隘乃遷

昇平橋東官地

故偽李司徒宅

殿廡堂齋鼎新為之

楊崇記吳縣學

舊在城西南隅賓興坊其地卑隘廟學皆簡陋旁逼
軍營牆雖相接春夏水潦四集牆壁傾仆誦習常輟
郡縣之長貳暨師生往往興慨欲改之而未能有當
其任者宣德七年工部右侍郎盧陵周君忱奉命撫
巡東吳諸郡偕知府豫章况君鍾同謁廟學見其不
稱因協謀更造之得隙地於縣治西南視舊學地廣

四倍高真平曠衆咸謂宜況君具其事得請於朝二君復相與議曰是役不可重費吾民遂計郡之諸倉歲積葦席得五十餘萬鬻米可五千餘石凡木石陶冶之資匠作力役之需悉於是取給而一毫不干於民復擇耆民王信等董其事經始於宣德九年冬十月訖工於明年夏五月以日計之二十三旬有奇成功速而人不知其勞享禮有殿講誦有堂藏書有閣宴休有亭以及門廡齋舍庖廐各以序列通為屋以間計之二百三十有餘成化八年知縣雍泰重建靈材用堅而人不知其費

星門牆壁皆板石為之弘治十年知縣鄺璠以學門回曲與儀門不相直乃徙教諭訓導廨宇於射圃且買民居廣之門內鑿泮池上作石橋又於學東得長

洲民沈鈺舍地為射圃

吳寬記蘇多屬縣惟吳之建最古縣皆有學惟吳學之遷

為近蓋學初迫於西城甚陋宣德乙卯周文襄公巡撫吳中與知府況侯始遷於今昇平橋東可謂美矣然人復以為有可改作者門偏而不直爾前令仍舊皆未暇及會監察御史海陽吳君一貫巡按至諸生言之君以為宜於是任邱鄭君璠以進士來為縣曰此費不甚固無難者未幾規制端整徑亦不迂而學益美矣君又以校官宅舍填塞門內而藏書閣後有菜圃復築而遷之學前舊有隙地獨缺其西南又購民居以廣之至於跨池以作梁臨衝以樹表凡所傾壞無不修治弘治丁巳春功既訖教諭李仁訓導熊永昌甘澤率諸生來言曰願有記也予家居二年見鄭君為政精敏若修學特其一耳惟今之人率以改作為勞民而以仍舊為省事者蓋出於魯人為長府之說也夫長府之制釋者以為藏貨財之所當時改

作或病其庠隘而欲新之未可知者若然則以利為意而刻剥攘奪之患必不能免此閔子所以止之而孔子則是之也如學校之設聚人才於斯明人倫於斯自昔惟患居上者不之務耳蓋鼓舞振作使游息之士感動其心自有不能已於學者此正教養之機也吳君克持憲體固不妄舉事者故記之以示後人

今學制左靈星門次戟門中為大成殿夾以兩廡靈

星門之左為杏壇戟門之右為慈湖楊先生祠

石刻云慈

湖先生文元楊公嘗就養吳學者思弗忘立祠縣之學嘉熙庚子門人青田趙與憲以郡守兼淮浙發運古鄆陳垧提點刑獄敬瞻遺像崇飾一新孟夏丁未舍菜奉安金壇湯遠永嘉葉某金華汪真卿麗水胡宗臣西安劉甄於潛何光華合沙葉越左吳興畢衡以官僚來門人為僚者會稽楊瑾龍泉張然里居者

新淞海制帥何元壽天台陳繼申自太學來咸相禮
宜教郎知平江府吳縣主管勸農公事兼軍正胡宗
臣立石 殿後為詠歸亭四圍鑿方池甃以文石欄楯如

之池後有石橋入射圃

橋木外通大河以受太湖之水

後為校官廨

宇右學門內為泮池跨以石橋次儀門為明倫堂傍
列兩齋東曰升俊西曰毓德齋上下皆學舍堂左為
先賢祠堂後為時雨堂為藏書閣閣左為廩庾右為

會饌堂

正統間邑人王信許美捐田一十八畝在本縣十一都以供月朔釋菜

長洲縣初未有學附於府學名曰麗澤齋宋景定三年

主學宋楚材率邑人請於守陳均即廣化寺藏室改

焉在今府城東北講堂曰禮堂

魏文靖公篆

四齋曰富文

貴德廣業博學又建景文堂

企慕范文正公故名俞琰記唐置長洲縣距今

三百餘年而學不建豈簿書期會不暇俎豆之事未
之聞歟景定壬戌詔縣增主學用丕儒教宋君楚材
實在茲選至之日乃嘆曰官以主學名居無廬士無
廩師倚席不講惕然以懼鄉寓劉公震孫列其行於
郡即近縣廢寺為肄習之所士不閒遠近畏糧而來
旬有講月有試考德問業於此可觀宋君又懼無以
繼乃裒俸餘與束脩之入輸於郡因寺建學以惠悠
久太守陳公均親來相度指前一塔矗如文筆顧而
揖曰殆天相歟於是徙佛像於他所宋君遂與諸生
經之營之斲者斤者亦各自獻其藝繇禮殿至學門

煥然一新齋舍庖湍靡不具備起於乙丑春成於丙寅夏民有爭田不決前守撥充養士且上於朝會召入李公輔來守是邦悉以歸之而士有所養宋君之志亦少舒究矣八年提刑洪起畏

拓地闢門南面後毀元至正三年縣長元童俾教諭

顧元龍者儒邊景元勸前徽州路教授郡人陸德源

初建之

陳旌記皇元混一六合興起學校以崇化基當時邑令即長洲駟舍為孔子廟大德六年

縣徙麗郡明年移駟材構縣治故址庫隘簡陋師弟子登降周旋相盪摩又無所於休息郡人陸德源顧而嘆曰席先世之貲產足以供公土之賦而具衣食於吾私矣於此而用其贏不亦可乎縣長官元童公聞而喜曰是能紓吾責者益以禮勸成之於是築吉日除故縣治地築長垣周之前起禮殿闢廣庭穹門

翼以邃廡後為西齋為論堂為庖廄凡所宜有者以
次皆為之材必良工必善規制嚴壯而改作堅緻浙
右邑校蓋未有能勝之者又屬名工凝土為先聖四
侑十哲之像而繪羣賢於從祀之位道德之光宛然
具在至元之三年三月經始明年十月告成觀者咨
嗟謂世之人率罄其所有以為老佛氏之宮今亦有
為是者乎德源又以為學雖美而歲入不足以養士
則徒為是虛器也乃又以田如干畝為學田以實之
旅以國史之命如京師道出吳門邑之士夫
請記之德源字靜遠今為徽州路儒學教授

國朝洪

武七年知縣宋敏文張翔修葺闢學門於廟之右故

有孔子燕居像

乃席地坐如跏然
顏淵子路立侍

又有先賢祠

祀季
札韋

應物陸龜蒙范仲淹
魏了翁文天祥

俱廢成化九年邱守霽隘之乃拓

地東南改建焉今學制廟左前為靈星門次戟門中

為大成殿夾以西廡外為泮池跨以石橋傍列碑亭

二右為學門內甬路左右列教諭訓導廨宇次儀門

中為明倫堂

周伯琦篆扁

兩齋傍峙東曰進德西曰脩業

左右皆學舍東會饌堂西厨房倉房射圃在大成殿

東成化十年邑人華岳捐田二十畝為月朔釋菜

田在

習義鄉二十都第九圖嘉靖二十年諸生與教諭蕭文佐議以

此地湫隘不稱倫魁乃白於巡按御史舒公汀謀遷

之郡守王侯廷密與謀議嘿為規度仲冬猝舉事廢
福寧寺為學官飭工就謀事遂克舉其制廟左學右
門皆南向廟前為櫺星門戟門中為大成殿殿後有
啟聖祠六經閣閣後有土阜建亭其上置曰道山亭
學前有門有儀門有明倫堂有兩齋曰進德曰修業
庭有碑亭右有射圃朔橋跨玉帶河其陰有鄉賢祠
祠後山丘有亭三楹置御製敬一箴其上其陽有名
宦祠有嘉樹館小淇園河之東為雲川書院西為宰

牲所教諭訓導衙舍分列左右學之外有昇龍橋面
陽樹綽楔曰萬代宗師東為玉帶橋亦有坊曰會元
西為折桂橋亦有坊曰狀元規模爽閭甲於天下時
咸稱舒公有風裁恆怯者風斯下矣吏部尚書朱希
周侍郎徐縉皆有記

崑山縣學初在縣治之東唐有文宣王廟以兵火廢大

歷九年始建學於廟垣之右設博士訓學徒

梁肅記
學之制

與政損益故學舉則道舉政污則道污崑吳東鄙之
縣先是有文宣王廟廟之後有學室中年兵饑荐臻

堂宇大壞方郡縣多故未遑繕完其後長民者或因
而葺之以民尚未泰故講習之事設而未備大厯九
年太原王綱以大理司直兼縣令既釋奠於廟退而
嘆曰夫化民成俗以學為本是而不崇何政之為乃
諭三老主吏整序民飾班事大啟室於廟垣之右聚
五經於其間以邑人沈嗣宗躬履經學俾為博士於
是遐邇學徒或童或冠不召而至如歸市焉公聽治
之暇則徃數大猷以聳之博考明德以翼之優而柔
之使自得之竭而厲之使自趨之故民見德興行始
於鄉黨洽於四境父罵其子兄勉其弟有不被儒服
而行莫不耻焉僉曰公之設教嚮其末不墜其本易
其俗不失其宜傳曰本立而道生昔崔瑗有南陽文
學志王粲有荊州文學志皆表儒訓以著不朽遂繼
其流為縣學記俾來者知我邑經藝文教之所以興
也

五季廟毀宋雍熙四年因遺址重建

王禹偁記吳
之諸郡姑蘇

稱其尊郡之屬邑崑山出其右雜以魚鹽之利溉乎
朝夕之潮昔在皇唐是為名邑降及錢氏茲惟上腴
距海之田民斯阜矣然而庠序或缺儒素弗興實倉
廩而禮義未知既富庶而教化不至為邑之長得無
咎乎縣大夫邊公世為儒流時號甲族自起家之調
厯宰邑之資所在播其能名儕類驚其久次大來之
望固未易知皇上嗣位之明年淮海王如京師且獻
圖籍尊王室也主上思泰遠人精擇循吏銅墨之任
尤難其才始得公以宰吳民受賜降璽書以勞之旌
善政也秩滿受代將選於天官會茲邑有令尹之乏
者二千石命公以承之且叙政績聞諸冕旒未幾有
即真之命免常調也公因民所利期月而治以為人
者教之本儒者教之先苟非師嚴而道尊焉可移風
易俗哉先是文宣王廟但有基址盡為蓁蕪廢而不
修六十年矣公乃出俸金以營之同僚悅隨郡吏弗
遠乃庀工徒乃度材用一畝之宮菲蔓以出之數仞

之牆樹土而揭之殿堂既嚴門闕斯備麗以丹漆飾以朽壤制度合乎禮文力役當乎農隙乃像素王被華衮垂珠旒王者之制彰矣乃狀十哲冠章甫衣縫掖儒者之服備矣廟之興也既如彼像之設也又如此粵上丁之晨行釋奠之禮所以列豆籩陳簋簠潔牲宰具蠶洗饗幣有數尸祝有辭八音作而人和三獻終而神悅禮無違者道不虛行觀之如堵墻化之猶影響俎豆之事修矣禮樂之道興矣十室之邑其忠信以如丘一變之風闡詩書而及魯議者曰吳地裸國也崑山海隅也舊染霸俗未行儒風非明君以文德敷萬邦非賢宰以儒術化百里又安能遵先王之教移小國之風者哉禹偁幸忝德鄰熟聞異政爰旌茂績俾述斯文難言雖在於聖門不朽願刊於貞石

元豐四年壞於風潮元

祐初知縣杜采遷今縣治西南作廟堂齋廡紹興二

十八年知縣程沂闢垣墻外門張九成記郡守蔣璫
名堂曰致道隆興間知縣李結葉子強周承勛李稠
相繼修之慶元間章萬里又修之改堂曰明倫

莫子純記

壯哉崑山之為縣也摶結峻絕白石如玉沃野墳腴
秔稻油油控江帶湖與海通波山川孕靈人物魁殊
則所謂玉人生此山山亦傳此名著於荆國文正公
之詠豈徒疎榮於往號抑亦延光於將來也洪惟我
朝用儒立國考辟雍泮宮之制京師郡國皆立學飾
祠廟以奉先聖闢黌宇以育多士崇稽古之洪道茂
長世之善經由是文治勃興炳然與三代同風猶慮
湛恩未廣聲教之未洽也申命縣司更置學宮先聖
廟如郡國之制景祐四年之詔也嘉猷四塞六合時
雍沐浴膏澤漸潤德教祁祁生徒濟濟儒術而崑山

三十載其美焉藻挾天庭考四海而有雋折瓊枝而繼珮固衆芳之所在也日引月長鮮克修事夏絃春誦家自為學先聖之居亦窘風雨朝奉郎知縣事章君萬里大懼不任以墜教基授模梓匠夙嚴神棲飾南端之特闢立應門之將將華觀相邀采題交輝乃營新堂乃恢廊廡後以玉甃繚以崇垣翬未及侈規遵王度是以經始勿亟成之不日庀工於慶元五年六月而以八月畢之於顯新宮既闕且康思欲復之而無數申之而有裕也於是捐供給贏貲斥圭租之羨賈易民田幾二頃括姦民隱占之田益三頃民之訟田法當沒入者復益其二頃酌舊町既夷且大俾其儲積供久而可繼也又為之新館舍之器用潔祭祀之籩豆亦衣布之餘財而非重費於公也既壯其室亦豐其儀躬率諸生行釋菜禮告奠於先聖昭事是肅敬謹威儀示民不佻煌煌乎茲文容之壯觀而王制之巨麗也而後乃知流大宋之德馨成在於

此仁風行而四達義方敷而遐驚聲名布護溢浹邑區菲言原行陶化染學昭光振耀立事立功効當年之用以對前修之純淑則崖風穴水不特清越餘馨而已宜伐石以志使是道也不替於後章君以子純嘗參吳門之幕乃列嘉定間巫似修重建大成殿淳其事來告俾書之

祐初徐聞詩脩袁歟增建直舍齋凡六曰居仁由義教忠履信致道成德十二年攝令吳堅建尊道貴德

二祠

尊道祀張子朱周子二程子貴德祀陸龜蒙張方平范仲淹李衡子南軒張氏知縣林桂發於

尊道增祀邵子司馬咸淳十一年貴德則移張方平於守令祠溫公呂東萊增范成大衛經陳振今俱廢

元元貞初陞為州學延祐元年州移太倉學隨之至

正十七年州復舊知州費復初仍建於此楊維禎記
國朝洪武二年改為縣學額定齋二宣德元年教諭
曹昇修戟門知縣羅永年修兩廡景泰天順間知縣
吳昭等改建大成殿弘治五年知縣楊子器建尊經
閣今學制左廟前為靈星門次戟門中為大成殿夾
以兩廡神庫在東廡北神厨在戟門外右為學門中
為明倫堂後堂扁曰育賢後為尊經閣兩齋東曰居仁西
曰由義各有學舍北為退省堂西會膳堂倉庫皆具

射圃凡八畝堂東西教官廨宇列焉

常熟縣學在縣治東南前臨運河

河東西俱通潮朝夕到學門相值中止

宋祥符圖經云縣東五十步有文宣王廟初不言學

僅有舊梁紀至和年蓋宋仁宗時云淳熙十年曾祭建堂曰進學紹熙

五年葉知幾改名明倫自書扁齋凡九曰崇德時習

好謀朋來利仁隆禮育英守卓隆德未幾又改四齋

名曰尚志尚德尚賢尚文慶元三年孫應時建吳公

子游祠

朱文公記常熟縣學丹陽公向者祀孔門高第弟子言偃子游也按太史公記孔門諸子

多東州之士獨公為吳人而此縣有巷名子游有橋
名文學相傳至今圖經又言公之故宅在縣西北而
舊井存焉今雖不復可見而公為此縣之人蓋不誣
矣慶元三年七月知縣事通直郎會稽孫應時乃即
其學宮講堂之東偏作為此堂以奉祠事而以書來
曰願有記燾惟三代之前帝王之興率在中土以故
德行道藝之教其行於近者著而人之觀感服習以
入焉者深若夫句吳之墟則在虞夏五服為要荒之
外爰自太伯采藥荆蠻始得其民而端委以臨之然
亦僅沒其身而虞仲之後相傳累世乃能有以自通
於上國其俗蓋亦朴鄙而不文矣公生其間乃獨能
悅周公仲尼之道而北學於中國遂因文學以得聖
人之一體豈不可謂豪傑之士哉今以論語考其語
言類皆簡易疎通高暢宏達其曰本之則無者雖若
見詘於子夏然要為知有本也則其所謂文學固宜
有以異乎今世之學矣既又考其行事則武成之政

不小其邑而必以詩書禮樂為先務其視有勇足民之效蓋有不足道者至使聖師聞之莞爾而笑則其與之之意豈淺淺哉及其取人則又以二事之細而得減明之賢亦其意氣之感默有以相契者以故近世論者意其為人必當敏於聞道而不滯於形器豈所謂南方之學得其精華者自古而已然邪矧今全吳通為畿輔文物之盛絕異曩時孫君於此又能稽古崇德以勵其學者則武城絃歌之意於是乎在故熹喜聞其事而樂為之書至於孔門設科之法與公之言所謂本所謂道及其所以取人者則願諸生相與勉焉以造其實使此邑之人百世之下復有如公者出而又有一灑夫媿懦憚事無庶耻嗜飲食之譏焉是則孫君之志而亦熹之願也公之追爵自開唐開元始封吳侯我宋大中祥符改封丹陽公云開禧三年葉凱修廟學端平初王爚倣郡學制東為廟

徙吳公祠於後建六先生祠

康溪橫渠明道
伊川晦菴南軒

西為學

扁堂曰明德凡六齋曰志道據德依仁游義稽古

儲

器祭服
官書

象賢

為小學教
言氏子孫

總百二十楹

魏了翁記常熟
縣令會稽王爚

屬邑士胡給胡淳以修學既成求記於了翁竊惟朱
子嘗記子游之祠矣如魯論所載二三事皆發揮無
餘貌茲孤陋安敢復措一辭然嘗讀禮書而竊有見
焉因附其載夫檀弓不知何人所作而一篇之書獨
於子游極其稱譽於孔門諸子率多譏評又以言曾
並列其是言而非曾者非一幾若偏於抑揚然即其
書以致之大抵當典禮訛闕無所考訂之時人之有
疑弗決者以質諸子游故前後典禮所關者士有四
皆以游一言為可否亦足以見其為時人之耳目雖
汰哉叔氏一語若譏之而實尊之然則游以習禮列

文學茲其為文學蓋三代典章之遺賴游以有存者
嗚呼信其為豪傑之士矣昔柳宗元謂論語所載弟
子必以字惟曾子有子不字遂謂是書出於曾門蓋
字與子皆得魚稱如門人之於孔子進而稱子不
氏退而稱仲尼不言子其次亦有既子且字如閔子
等不一二人或子或字者又數人然淵弓至游夏最
號高弟字而不能子也有子曾子子而不得字也就
二者而論則字為尊蓋子雖有師道之稱係於氏者
不過男子之美稱耳故孝經字仲尼而子曾子禮運
字仲尼而名言偃至今人之字仲尼者無敢以為疑
仲尼作春秋二百四十二年間字而不名者僅十有
二人而游夏諸子之門人亦各字其師相承至於漢
初猶未敢輕以字許之即是而觀則子游以勾吳孤
遠之士遂得字而不子以列於高弟之目此又豈易
易然者今英門容邁行都而常熟為壯縣有如游之
北學洙泗遂以習禮輩行顏閔寥寥千載間豈終無

其人邪或者狃於習俗未有以自振我朱子既嘗表其事以風厲之予又何言獨惟山川風氣古猶夫人也誦先聖之書服先賢之訓嗚呼其必有聞風興起以無負建學尊賢之意者士其勉之元陞州

學國朝改縣學洪武八年建先賢祠於子游祠東

奉文

正范公安定胡公修齋王公燐

闢射圃建觀德亭宣德九年知縣郭

南修兩廡學門及厨庫大學士楊榮記正統二年况

守鍾修兩齋正統六年縣丞陳澄建尊經閣

吳訥記癸亥歲

五月朔訥抱病家居教諭趙永言來謁曰正統辛酉冬縣丞陳澄掌邑事永言告曰本學曩承太祖高皇帝頒降大明律等書暨太宗文皇帝五經四書大全等集俱置廡下地土卑濕厯閱蒸沍倘得樓閣以藏

庶盡其宜。貳令聞而善之。廼撤堂後寢屋捐俸為倡。復勸邑人鳩匠市材建閣五間。二夾室名曰尊經之閣。時縣令郭南公出而歸。出俸完其未備。敢求一言垂示不朽。然永言讀諸碑誌心竊有疑。蔽國朱子為知縣孫應時記言。公祠記中所謂南方之學得其精華及一灑。媮懦無廉耻嗜飲食之譏。幸併開釋以告。後學於戲訥蚤遊邑庠。竊有得其一二焉。按隋書儒林傳序云。南北所為章句。南人約簡得其精華。又按荀况非十二子篇云。媮懦憚事無廉耻嗜飲食。是子游氏之儒。夫子游聖門高弟。論子夏門人之學。知大學之本治武城。知禮樂之道。豈有荀况所譏者乎。荀去子游幾一百載。其時弟子鄉人或狃於習俗。遂乃譏及子游。故記云。願諸生勉進。所謂本所謂道。使此邑之人百世之下。復有如公者。出一灑其弊。期望後學至深切矣。

成化二年知縣甘澤修廟學徐有貞記弘治

八年巡按御史劉廷瓚重修學士李傑記今學制左
為大成殿夾以兩廡神庫厨皆具右為學門次儀門
中為明倫堂傍列兩齋東曰致道西曰據德齋上下
皆學舍又有射圃尊經閣會饌堂

吳江縣學在縣治東南初有文宣王廟在縣治西宋大
中祥符間詔天下修廟學縣令李恭尉聶復始作新
之轉運使陳堯佐記慶厯七年縣令李問尉王庭堅
欲重建廟學勸民輸錢數百萬會詔止不果

乃以其
財建長

橋

元祐間知縣程端始竟其事建炎金兵燬紹興間

知縣石轍即東門外開江營舊基改建邑人王份獻

地廣之即今址也淳熙初知縣趙公廣拓其地建齋

三十楹歲入米幾千斛錢若干以給學費

陳榮古記
學校者政

本之所自出講禮閱樂習射考藝養老齒胄獻囚告
讖無不寓焉詎可一日廢也乾道之初知縣趙公領
事之始慨然嘆曰學校鞠為園蔬邑之父兄鮮以夫
子之道詔其子弟甚者先聖殿廬上雨旁風春秋奠
菜無所于庇此今所當憂也卜日鳩徒撤舊更新夷
荒剔蠹周以重階堊以兩廡廟室環列繪象生師有
舍禮器有所賓客之廬庖廩之次無一不具公曰學
具矣無資財以養士徒學焉於是將舊籍漁貊月計

錢二十萬永為廩餼之費凡片瓦尺椽市於旁邑民不告勞丞俞希尹實贊其事經始於乙未之秋落成於是歲之冬邑之羣士鼓篋驅趨以後為耻弦歌之聲夜以繼日公又嚴規程以防其急者則公之慮遠不為朝夕計益可嘉也公名公廣字德倫今為南徐別駕邑之人不忘公惠相與請記於予欲刻之樂石以告後人嘉定八年孫仁榮重建大成殿十年知縣呂祖憲修之宋季悉毀於兵元至元十三年都元帥竄玉校尉杜福重建殿宇塑繪聖賢像三十一年知縣王柔建講堂齋舍元貞二年陞縣為州改州學立四齋大德二年教授謝起東建兩廡繪從祀諸賢四年知州

李玘建靈星門七年州判王英重飾聖賢像延祐至
正間知州高仁孔文相邵子敬達嚕噶齊咱雅津相
繼修之國朝洪武二年仍改縣學定為齋二正統十
三年周巡撫忱朱守勝隘之徙左右民居以展宮牆
景泰六年知縣賈亮建廟於堂左今學制左廟外為
靈星門次戟門中為大成殿夾以兩廡傍有宰牲房
神厨神庫右學外為門次儀門中為明倫堂次為後
堂兩齋左曰日新右曰時習齋上下俱學舍堂後為

膳堂厨房倉房與俱戟門左為鄉賢祠射圃在學南
一里

嘉定縣學在縣治南宋嘉定十二年知縣高演孫建堂
曰化成齋曰博文敦行立忠履信凡四紹定二年王
選修改堂名明倫齋名正心博學篤行明德淳祐九
年林應炎塑聖像作直舍咸淳初史俊卿修飾殿宇
元至元間邑民王子昭入田租若干元貞二年陞為
州學大德三年教授楊巽申所司繪從祀諸賢像增

置祭器樂器及租田天歷二年知州趙道泰重建大成殿移堂於殿南至正十二年郭良弼易諸賢塑像建燕居殿十六年堂燬明年張元良建儀門兩齋國朝洪武二年改縣學六年知縣文殊努修靈星門大成殿射圃亭二十二年教諭劉愷呈所司建神廚庫房宰牲所二十三年御史張文富建學舍及會饌堂宣德元年知縣祖述重建燕居廟作春風堂及兩廡天順四年龍晉重建殿及門廡堂舍築土山學南成

化間知縣洪冕白思明吳哲相繼修建泮池石橋尊
經閣弘治間知縣王術修兩廡今學制左廟外為靈
星門內泮池次戟門中為大成殿夾以兩廡後為燕
居殿神厨在門西神庫宰牲房稍南上右為學門次
儀門中為明倫堂兩齋東曰進德西曰修業週圍學
舍會膳之所名春風堂射圃亭在學門南

天台周仁
榮大成樂

記大德十一年詔尊夫子加號大成至聖文宣王於
是夫子之殿與祭祀之學舊名大成者始益尊明越
十有七祀嘉定州儒學大成樂成教授劉德載以知
州周思明書請記仁榮曰自漢以降祀夫子用六樂

用軒縣用宮縣至用大成樂制樂章十二篇叙一德以降神備衆善以致饗燕後名正實著因用無損益其器金之音編鐘十有六石之音編磬十有六為一肆絲之音琴瑟十有二琴五絃至九絃凡五等等各二瑟之數如其等簫二箎二為竹之音篳篥二為匏之音土則埙二革則搏拊二木則祝二以龔虞牙業甄麾翬竿流蘇之屬為之飭以五聲六律六呂為之用夫樂與升歌旋相為之宮也樂之宮在律則呂為升歌之宮樂之宮在呂則升歌之宮乃在律陰陽之氣和宮商始得合矣漢儒謂祭尚柔無商音失旋相之義也旋相之樂無射為宮則黃鍾為商宮君象商臣象君聲不可小臣聲不可大因半黃鍾之管為四清宮以是旋相之奏有四清聲者抑臣以尊君也八音與政通樂云乎哉樂像成也夫子之聖猶金聲玉振始終條理合衆小成為一大成故樂修於學可以通神明美教化移風俗古人司樂掌成均之法以治

建國之學政樂德樂語樂舞皆教之事今之日知州與教授興學而脩樂知古之教也夫豈曰用於祭祀哉
嘉靖十五年縣令李資坤重修廟學吳惠記增置
學田周鳴鳳記二十一年縣令馬麟改建啟聖祠徐
階記又築輔文山於學宮左

太倉州學在州治西元至正間州徙崑山學廢國朝洪
武初設太倉鎮海二衛正統間周巡撫忱始建衛學
於故水軍都萬戶府第即其堂宇為明倫及後堂新
作靈星戟門大成殿兩廡并祭器之屬景泰三年增

建神厨神庫宰牲房及學舍教授李亨記天順四年

訓導徐璧建鄉賢祠於戟門右

祀宋鄭亶元余詮馬
麐郭翼殷奎陸仁鄭

明德國朝盧熊項駕秦約袁華
陳潛夫文質王履沈璵楊濂夫

成化六年巡撫滕昭

又增建學舍十年巡撫畢亨重建明倫堂弘治十年

始立太倉州知州李端增造兩齋今學之制右為靈

星門次戟門中為大成殿傍為兩廡神庫神厨宰牲

房皆具右為學門中為明倫堂兩齋左曰忠義右曰

孝敬學舍若干堂右有文會堂後有射圃及教官公

廨學田凡二頃二十三畝二分租一百一十一石有
奇亦周巡撫所置云嘉靖九年知州陳璜建六經閣
十七年知州林塋增置學田

崇明縣學在州治之崇文坊宋嘉熙間奉使趙崇侯始
建書堂元陞為州學泰定間建殿堂齋廡未幾壞於
潮至正間乃遷今地修撰張士堅記國朝洪武二年
改為縣學宣德初邑人給事中彭仲玉為置祭器成
化二十年邑民傳謹捐資建靈星門以石今學左廟

前為靈星門次戟門中為大成殿夾以兩廡後為射

圃右為學門中為明倫堂傍為兩齋東曰博文西曰

約禮教官廳宇分列焉

徐有貞記成化紀元之六年
崇明縣新修廟學成廼秋八

月上丁既釋奠於先師教諭武平胡泰司訓餘姚李
居義宜陽王巖率諸生陸孟剛等具是始末來曰惟
茲廟學之新實今知縣事廣信汪君士遠之績也願
有記今天下惟崇明新造邦其始本海涌之沙也沙
積而土又焉土久而民聚焉民聚而官興焉然在唐
為游徼之鎮在宋為權鹽之場時猶未入職方也乃
自元及我朝始為州隸揚於江外今為縣隸蘇於畿
內畿內縣眎江外州為重矧殿國良維鍵制海道其
重眎諸赤縣又加焉故雖一邑而常宿重兵守之地
之重則官守亦從而重然以沙塗之壤中海而居風

濤之所齧蝕蛟龍之所齕齕靡有定時故自入職方以來僅二百年而城治之徙者三矣城治徙則學宮從而徙焉蓋地之勢北高而南下故徙而益北至是垂六十年而民無昏墊之虞城守則可謂固矣而學宮未備然自洪武以來為令於斯者歷數十政矣而其於城治於學校而俱能成之者惟前令永平王允威及士達爾蓋二君皆名進士也允威遷象郡守方伯至都憲自其去崇明後又更數政政靡事隳迨茲繇士達振之士達勞績不惟廟學而廟學其尤用心之至者也

社學

洪武八年詔府州縣每五十家設社學一本府城市鄉村共建七百三十七所歲久漸廢正統十二年朱

守勝乃總建一所於清嘉坊東雍熙寺橋西堂五間

西齋一十二間左立朱文公祠堂外立升俊育英二

坊選長吳二縣民間俊秀子弟三百餘名教之

徐理
記言

吏治於三代之下而能以教道為先務固君子之所為也然知此鮮矣若吾郡太守朱侯其知先務者哉初侯之至也既行三學率儒官敷教事則又以謂古之學者必自小學而入大學蒙養既正而後進之以成德故其所至之大非後世之士所可及焉今鄉校不立小學教弛士業失序躍等以進安望其才之古若也乃行視郡城清嘉坊之東有地焉負陰面陽挾爽壇而臨高明卜之食諡之地主繆賢氏賢固善士亦樂以為學宮也遂獻之侯乃鳩工庀材審方定位中作講堂旁闢兩齋又相其左建祠以祀先師朱子

而以鄉先生之應從祀者配焉繚以周垣鍵以重門
廩庫庖湍無不飭具經始於正統丁卯之秋落成於
戊辰之冬禮聘開儒鄭鏐德輝陳寬孟賢以主師席
選吳長二邑蒙士之秀者充弟子員而教之遇三學
之士有闕員者則進其良以補焉侯於臨政之暇輒
至學引師儒坐講堂進諸生親課之以故民間俊秀
彬彬焉興於學有古鄒魯之風於乎侯於是可與漢
之文翁唐之韓愈宋之范仲淹異世而同功矣侯名
勝字仲高
金華人也

若各縣社學皆成化二年提學御史陳選所建

書院

書院凡六設官主教事者四

學道文學
和靖甫里子孫奉祠事

者二

文正
鶴山

今唯文正鶴山存而鶴山又為巡撫公署

乃以後屋為祭所云

學道書院為吳公言偃立初在府城東北隅

今長洲
縣學南

宋

咸淳五年知府趙順孫營度武狀元坊北普賢子院

故址未成去黃鏞繼之奏以學道為額選言氏與先

賢後及民間俊秀教之別建殿曰燕居以奉先聖建

堂曰師友淵源齋凡四曰正己選賢問禮知本撥官

田以贍士又別為育材莊專充孔顏言氏子孫費

非
土

著者六年落成鏞行釋菜禮山長陳宗亮升堂講學不預

道愛人之義堂講顏堯煥胡應清分講論孟衣冠森

列聽者充然

陳宜中記昔者夫子講道齊魯之郊從遊多北方之士由勾吳之墟登聖門者

獨吳公子游一人今常熟其故里也故有祠紫陽先生嘗記之矣而郡則未講非前此司人風者闕歟今樞密趙公順孫守吳甫欲經始而召余友黃侯鏞繼之鳩工度材命元僚陳宗亮董其事三越月而堂成請於朝扁以學道書院取愛人易使之義而屬余記之余按公以文學列四科嘉言善行可傳者不一獨以二語乃親得於聖人而見於用復以印可於聖人者思昔三代盛時聖教流行滿天地之間無非道舉天下之人無非學康衢童子如詠舞雩中林武夫如見大賓漢廣遊女如在文上由後世言雖若未嘗學

問而其所所得所見訓詁章句豈能傳之哉流風未遠
列國遺民途歌巷詠發乎情而止乎先生之澤夫子
拾其斷句殘篇而存之非但疏越遺音寥寥於後而
其吟咏性情於辭意之外亦非尋行數墨者所能知
也道在天地終古常新何昔能為天下公而今幾為
君子隱邪此余所以慨然正學絕續之際想弦歌之
聲而不可得聞猶幸登斯堂者能有感於命
名之義人心未喪斯文或因之而興起也歟
琳於堂西建先賢祠

祀顏曾思孟左次澹臺子羽兩序列周程以下九賢

元初

僧楊總統據為僧司田悉奪去至元二十九年山長

祖宗震金德修共買徐貴子橋高氏園第改創

即今書院

儒職劉德剛訴復學田不果今廢國朝嘉靖二年知

府胡纘宗閱郡乘載書院者四今獨存文正鶴山為
祠餘悉結民廬乃以景德廢寺改建書院其前為門
扁曰東南鄒魯儀門曰學道書院塞門曰學得精華
堂曰學孔堂塑吳公言子像於其中夾以兩廊各有
三十餘號舍其後又為堂三楹堂後有樓曰弦歌樓
樓前各有屋三楹公每課士頻蒞此地學道愛人之
旨諄復不勒一時文學勃興甲於東南識者蓋亦知
有自云院之東因割隙地為文恪公祠

文學書院在常熟縣行春坊內元至順三年縣人曹善誠建有司上其事省部准設山長翰林待制楊剛中記宣慰使王都中題扁今廢

甫里書院唐魯望先生之故第在府城東南

今長洲縣治東元

元統二年裔孫德原請於郡以己貲建書院有宣聖殿明倫堂大小學二齋設山長主教事今廢

丈正書院在禪興寺橋西咸淳中郡守潛說友立祠祀公撥公田三百餘畝以公大宗子孫主奉祠事歲時

率僚屬致祭元至正六年總管吳秉彛奏公有道學

功請改祠為書院

李祁記吳郡祀范文正公舊矣自公貴顯時置義田義學以淑其族

之人公歿而子孫世守之不廢然而未有專祠也咸淳甲戌郡守潛公說友始請建祠而割田以供祀事公之子孫亦世守之不廢然而未有書院也至正丙戌郡守吳公秉彛建議議請以書院易祠僉憲趙公承禧按行吳中是其議遂得請於行省行省上之中書中書議以茲事有關世道且不設教官而以其子孫之居嫡者世主之於事便乃下從其請公八世孫文英適主祠事竭力殫慮改制增擴亦既宏且遠矣祁時佐領江浙儒學以公事來謁祠下式指其成衆謂不可以無紀而祁也幸際其會宜為文辭既不獲則取其家傳而徵之公之生當宋端拱己丑其歿也以皇祐壬辰至潛公為守時二百二十年天下郡縣凡

公之所至蒙其澤而聞其風者率為公立祠而於吳獨為缺典至吳公為守時又七十年他郡縣且有以祠為書院者矣而於吳尚仍舊規蓋吳為公父母之邦公之父祖墳墓在焉子孫居焉族之人比屋而羣處焉所以表異而褒崇之者宜有加於他郡而反若不及者是宜賢郡守之有請也是宜廟堂之上之從之也昔公以正大之學卓冠羣賢以忠義之氣振厲天下其功之被當時而澤後世者固不可徧舉其切而近者則公於所在開設學校以教育多士至吳郡則以己地建學規制崇廣迨公之子恭獻公復割田以成公之志當是時天下郡縣未嘗皆置學也而學校之徧天下自公始若其舉泰山孫氏於貧窶中使得以究其業延安定胡公入太學為學者師卒之泰山以經術大鳴于時安定之門人才輩出而河南程叔子尤遇賞拔公之造就人才已如此其後橫渠張子以盛氣自負公復折之以儒者名教且授之以中

庸卒之闕陝之教與伊洛相表裏蓋自六經晦蝕聖人之道不傳為治者不知所尊尚寥寥以至於公而後開學校隆師儒誘掖勸獎以成就天下之士且以開萬世道統之傳則公之有功名教夫豈小哉夫以公之有功名教如此則後世之宗而祀之為學校以廣之固宜與夫子之道相為無窮蓋夫子之道與天地為無窮而公之功則與夫子之道為無窮也此書院之所以立也

孫世守其所

和靖書院祀宋尹肅公初公讀書虎邱西菴題齋曰三畏嘉定七年士人黃士毅請於知府陳希繪像祀之端平二年胡淳請即其地為學倉司曹幽因奏立書

院以和靖為額齋凡四曰三省務本朋來時習提舉
馬述建君子堂嘉熙四年提舉陳振孫作藏書堂景
定二年陳淳组建曹幽祠堂咸淳初提舉李芾建燕
居堂以奉先聖建時習齋持敬亭元初為雲巖寺僧
所據延祐元年始移置今所在長洲縣治東烏鵲橋
北即宋常平提舉司故
址郡守道通重建殿廡門堂總若干間今廢國朝嘉
靖二年郡守胡纘宗又以吳縣學生多在湖山往復
險阻然憇寓假賃靡所寧止弗稱養士遂因學後有

龍興寺改復書院堂宇廡舍仍舊而脩飾之其後吳尹汪旦以肅公專祠當在虎邱乃請於巡按御史何春以後堂三楹置義夫馬谿木主其中

金鄉書院在西市坊內亦國朝郡守胡纘宗以長洲學諸生多家川澤來則就舳舻莫獲棲息乃示永定寺僧曰僧殘寺廢今改建書院庶寺廢而僧存遂因殿宇為門廡亭館窮鄉僻處始入城郭者若寧家焉

鶴山書院在南宮坊內宋魏文靖公了翁之賜第也公

蜀人仕至參知政事學者稱為鶴山先生端平三年

理宗親書鶴山書院四字賜之元至順元年曾孫起

即故居教學奉祠

虞集記昔者儒先論道統之傳自伏羲神農黃帝堯舜禹湯文武周

公至於孔子而後學者傳焉顏子沒其學不傳曾子以其傳授之聖孫子思而孔子之精微益以明著孟子得以擴而充之後千五百年以至於宋汝南周氏又深有取於曾子之學以成己而教人而張子厚氏又多得於孟子者也顏曾之學均出於夫子豈有異哉因其資之所及而用力有不同焉者爾然則所謂道統者其可以妄議乎哉朱元晦氏論定諸君子之言而集其成蓋天運也而一時小人用事惡其厲己倡邪說以為之禁士大夫深蹈其禍而學者公自絕以苟全及其禁開則又皆竊取緒餘徼倖仕進而已

論世道者能無盡然于茲乎方是時蜀之臨邛有魏
華父氏起於白鶴山之下奮然有以倡其說於推廢
之餘拯其弊於口耳之末故其立朝惓惓焉以周程
張朱四子易名為請尊其統而接其傳非直為之名
也及既得列祀孔廟而贊書乃以屬諸魏氏士君子
之公論固以與之矣及我聖朝奄有區夏至於延祐
之歲文治益盛仍以四君子并河南邵氏洙水司馬
氏新安朱氏廣漢張氏東萊呂氏與我朝許文正公
十儒者在從祀之列魏氏曾孫曰起者隱居吳中讀
詔書而有感焉曰此吾曾大父之志也何幸親復見
諸聖明之朝哉今天下學校並興凡儒先之所經歷
往往列為學官而我先世鶴山書院者臨邛之灌莽
莫之翦治其僑諸靖州者存亦無幾而曾大父實莢
吳先廬在焉願規為講誦之舍奉祀先君子而推明
其學雖然不敢專也泰定甲子之秋廼來京師將有
請焉徘徊久之莫伸其說至順元年八月乙亥皇帝

在奎章之閣思道無為博士柯九思得侍左右因及
魏氏所傳之學與其孫起之志上嘉念焉命臣集題
鶴山書院著記以賜之臣聞魏氏之為學即物以明
義反身以求仁審夫小學文藝之細以推致乎典禮
會通之大本諸平居室陋之隱而充極於天地鬼神
之著儼然立朝之大節不以夷險而少變而立言垂
世又足以作新乎斯人蓋庶幾乎不悖不惑者矣若
夫聖賢之書實由秦漢以來諸儒誦而傳之得至於
今其師弟子所授受以額門相尚雖卒莫得其要然
而古人之遺制前哲之緒言或者存於其間蓋有不
可廢者自濂洛之說行朱氏祖述而發明之於是學
者知趨乎道德性命之本廓如也而從事於斯者誦
習其成言惟日不足所謂傳文多識之事若得畧焉
則亦有所未盡者矣況乎近世之弊好為鹵莽其求
於此者或未切於身心而攷諸彼者曾弗及於詳博
於是傳注之所存者其舛譌抵牾之相承既無以明

辯其非是而名物度數之幸在者又不察其本原誠使有為於世何以徵聖人制作之意而為因革損益之器哉魏氏又有憂於此也故其致知之日加意於儀禮周官大小戴之記及取諸經注疏正義之文據事別類而錄之謂之九經要義其志將以見夫道器之不離而有以正其臆說聚訟之惑世此正張氏以禮為教而程氏所謂徹上徹下之語者也而後人莫究其說以魚致其力焉昔之所謂鹵莽日以彌甚甘心自棄於孤陋寡聞之歸嗚呼魏氏之學其可不講乎今起之言曰起幸其身逢聖天子文治之盛追念先世深惜舊名起將於斯與明師良友教其族人子孫昆弟及鄉黨州閭之後秀庶乎先君子之遺意而魏氏子孫世奉其祀事精神血氣之感通亦於是乎在其有託於永久而不墜也不亦悲乎臣之曾大父實與魏氏同學於蜀西故臣得
其粗者如此敢輒書以為記

姑蘇志卷二十四